

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 10 1952

2

T 1202/7372

濂溪遺著集

周元公世系遺芳集卷之十一

目錄

諫議大夫遺像

諫議大夫事略

國朝免役詔

國朝追配啟聖祀典

配享府學啟聖祠祭文 郡侯孫成秦

配享縣學啟聖祭畢口占 邑侯江盈科

鼻祖諫議大夫配享啟聖祠喜而有賦

十八代孫希孟

哈佛大學漢和
圖書館珍藏印

諫議大夫事略

諫議大夫諱輔成字孟匡其事實已詳元公年譜
山陽度正著宋代有專祠公孫同堂春秋享祀亦
詳載

國典并歐陽玄誌中俱不多贅祇錄入鄉賢祠傳附
左

宋周輔成元公之父世居營道之濂溪大中祥符
八年蔡齊榜進士所歷多善政終賀州桂嶺令以
元公貴累贈諫議大夫 載永州府道州誌

周元公世系遺芳集卷之十一

吳郡守祠奉祀孫與爵 編輯

國朝免役詔

謹按

皇明資治統記於

國朝正統元年始設提督學校官員各省設按察司
副使或僉事各一員南北直隸監察御史各一員
請

勅專一督免聖賢子孫差役

詔凡先聖子孫流寓他處及先賢道國公周惇頤豫

周氏遺考集 卷之十一
國公程顥洛國公程頤溫國公司馬光徽國公朱熹之嫡派子孫所在有司俱免差役

國朝追配啟聖祀典

附臺臣題請奏文并禮部移咨

直隸蘇州府爲三楚儒先輿論有定祀典獨遺懇乞

聖明俯賜一體從祀以重本源以隆文教事蒙

欽差整飭蘇松常鎮兵備按察曹 案驗會同

欽差督理蘇松常鎮糧儲水利參政彭 案驗奉

欽差巡撫兵部右侍郎兼右僉都御史趙 案驗前

事准

禮部咨該本部題祠祭清吏司案呈奉

巡撫湖廣等處右僉都御史郭惟賢據湖廣布政

使司左布政李得陽按察司按察使詹貞吉會呈

奉臣批據道州署印永州府推官李朝宸申稱宋

儒周惇頤父輔成名重制科行重士論據闔州士

民呈請相應從祀躋配啟聖公祠緣由到院據此

該本院看得先儒周惇頤開有宋道學之傳爲三

楚斯文之祖其父周輔成誌稱其居官有善政以

賢祀於鄉及查程朱二先生俱得推崇於所生在

從祀之列而輔成猶然未與良爲缺典事關題

請仰道詳查輔成功德行誼應否比例從祀以慰士
民之請覈實通詳以憑會題施行等因奉此依奉
行據永州府呈據道州申稱行據本州儒學申據
通學廩增附生員黃廷試楊仲仁楊大正李應奎
等呈查勘得周元公父考周輔成於宋之祥符八
年登蔡齊榜進士所歷多有善政終於賀州桂嶺
令至治平四年加贈諫議大夫享祀鄉賢歷年久
遠及查程子父程珦官終大中大夫朱子父朱松
官歷尤溪尉知饒州查得弘治年間學士程敏政
上疏言治天下以祀典爲重孔子功在萬世顏曾

思孟配享在殿而父在兩廡非以明倫宜別立一
祠祀叔梁紇而以顏無繇曾點孔鯉孟孫氏配享
時尚未見舉行又查得嘉靖九年大學士張孚敬
建議蒙

賜立啟聖祠祀叔梁紇稱啟聖公孔氏神位以顏無
繇曾點孔鯉孟孫氏配享俱稱先賢某氏神位以
程珦朱松從祀俱稱先儒某氏神位是皆一時義
起之禮元公父考如蒙轉詳題請誠爲聿隆道學
之盛事也等情呈學申州據此該州事本府推官
李朝宸看得宋儒周惇頤之父周輔成名重制科

唐氏遺考集 卷之十一 三十一
官遊桂嶺州誌稱其歷官有善政而從祀鄉賢則其爲人蓋居焉足以表正乎鄉閭仕焉足以康阜乎黎庶是誠士林表表者也躋配啟聖殊爲不忝再查程朱之父俱以嘉靖初年從祀啟聖而當時偶遺輔成夫

國家恩典功在一時者恩猶及祖考而惇願功在萬世乃後人從祀不推及其所生非所以彰我

朝崇儒重道之典且今士民歷數從祀莫不快程朱之享報至於惇願獨不見其親之神位其不扼腕而虛唏者鮮矣此誠天理之在人心不容泯滅者

也順人心之天理奉

國家之盛典廣推恩之大義報垂世之偉功即使志行泯然一無見聞猶當從祀况其懿行可稱者乎合無俯從轉達題

請躋輔成從祀

啟聖斯文幸甚人心幸甚等因到府據此該本府署印同知張守剛看得先儒周惇願父輔成據起家則名登甲第語宦遊則績著專城有志行以推重於桑梓肆祀典以崇報於鄉社是誠先儒之可述允爲後學之共欽况其篤生真儒倡明絕學使天

下後世得尋孔孟之真傳是功雖不在於其身實
於其子揆之顏孟因子及父之義顏孟之父稱先
賢而配享則周惇頤之父自應稱先儒以崇祀等
因呈詳到道據此該

本道俞 看得程朱爲宋室醇儒而其源則出自
周濂溪程子之父珦朱子之父松俱於嘉靖年間
以子之故從祀 啟聖而尚不及周子之父輔成
豈非缺典父以子重非甚不肖亦宜從厚况珦松
固賢而輔成以進士起家宦遊有善政鄉賢有明
禮人品蓋不在珦松之下木本水源程朱之父旣

得邀殊恩於前情同事類濂溪之父亦得修
盛典於今此崇儒重道真贊揚風美之急務也合無
俯賜題

請將輔成牌位躋入

啟聖祠中與程珦朱松併得從祠等因奉批據議事
關從祀重典仰布政司會同按察司覆議詳報奉
此隨該

本司李 會同

按察司詹 覆議看得重道崇儒乃

朝廷馭世之大典表往風後亦有司易俗之微權矧

先儒周元公惇頤續千載理學之正傳而其父諫
議大夫輔成啟百代人文之道脉今嗣其學如程
朱二先生反得推崇所生祀之 啟聖輔成生有
惠政歿有榮名僅僅俎豆於其鄉詎非數百年之
缺典歟及照褒前錄後禮制固宜查得正統年間
順天府推官徐郁曾奏復其家已荷

俞允今獨不可追祀其先以風勵後學乎似應如議
題

請從祀 啟聖呈詳到臣據此該臣會同

巡按湖廣監察御史徐兆魁議看得道有開先禮

隆報本周惇頤起宋天禧年間默契道體首倡正
學於聖遠言湮之後俾孔孟道脉斷而復續迄今
太極圖通書學士家尊之與六經等其有功於斯
世甚大而推邇篤生之自則其父周輔成也人因
道重惇頤已在從祀之列父以子崇輔成何獨遺
啟聖之祀况程朱之學皆本自惇頤真傳而二氏
之父如程珦如朱松先於嘉靖年間伏荷

賜允從祀廟食百年矣輔成歷官有善政居鄉稱鄉
賢方之珦與松其好修行誼以表鄉閭同其篤生
哲人以維道脉同論賢宜比肩而合席論功當祭

川而先河迺珦松久祀於廟與顏曾諸氏均禋而
輔成止祀於鄉未獲同珦松配食此非所以隆報
稱而昭大公也事有崇於儒先而實關於世教典
偶缺於往昔而實待於

明時稽之士論僉同非徒光借俎豆惟是斯文一體
自當推報淵源臣叨役地方不敢拂輿論之公不
舉泯往哲世德之休光不揚旣經司道勘議前來
相應題

請伏乞

勅下禮部再加查議如果臣等所言不謬查照程珦

朱松事例進周惇頤父從祀 啟聖庶海內人士
仰見

皇上崇儒重道之典於前有光而礪世磨鈍之意永
之不窮矣等因又該

巡按湖廣監察御史徐兆魁等題同前事俱奉

聖旨禮部知道欽此欽遵通抄到部送司查得

大明會典嘉靖九年令南京國子監并天下學校各

建啟聖公祠祀叔梁紇以顏無繇曾典孔鯉孟孫

氏配程珦朱松蔡文定從祀蓋從輔臣張孚敬之

請也又查得

大明一統制內開周輔成道州人世居營道之濂溪
登大中祥符八年進士歷官多善政終於桂嶺令
累贈諫議大夫子惇願今該前因通查案呈到部
看得巡撫湖廣右僉都御史郭惟賢及巡按湖廣
監察御史徐兆魁會題乞要將宋儒周惇願父諫
議大夫周輔成從祀啟聖公祠一節爲照道以人
傳父因子重自古然矣我

國家崇儒重道欲以敦化明倫故旣以程顥程頤朱
熹從祀於孔子廟庭而又以程顥程頤之父程珦
朱熹之父朱松從祀於啟聖公祠無非推尊道學

之源顯示扶世立教之意典固甚鴻鉅而義亦至
深遠也然考自微言旣絕而首倡明斯道者周惇
願也其篤生賢嗣而俾有功斯道者周輔成也有
輔成爲之父而後有惇願爲之子有惇願倡之先
而後有程朱繼之後道一源流學同弓冶追本窮
源宜其重則俱重祀則俱祀也乃程朱二氏旣得
因子而推恩於其父而輔成一人獨不得以父而
食報於其子當時議者豈以從祀者在著述而輔
成尠所闡繹歟及查輔臣張孚敬申明程敏政之
說曰臣竊觀聖學失傳千五百年至程朱出而後

孟氏之統始續則程朱之先亦不可缺况程子之父封永年伯程珦朱子之父謚靖獻公朱松其歷官行已俱有稱述臣愚乞將程珦朱松從祀啟聖祠此當時珦松從祀之由亦不過論其賢而已初未嘗及於著述何如也今觀永誌輔成名高甲第望重鄉評善政屢徵於宦遊令德累沾乎贈典想其爲人固亦闇然自修而有日章之實殆非歿世不稱後世無述者卽與珦松較隆比例何多讓焉是以三子而論則昔之善教者重在父均有得於義方以三子之父而論則今之從祀者重在子不專在乎著述若輔成者雖

賜之以贈謚允宜而列之於俎豆奚忝今珦松儼然從祀已久而輔成不預並侑之列委爲缺典旣經該處撫按會官詳議具題前來似非出於一人之私臣等博採史傳廣加諮詢深見協乎輿論之公相應將輔成

准其從祀啟聖與珦松一體追崇庶足以慰先儒尊親之望而對天下好德之心謹據實覆請伏候

命下臣等查照從祀禮儀開坐另題施行等因萬曆二十三年七月十七日禮部尚書兼翰林院學士

周氏遺集 卷之十一 三十一
范謙等具題二十日奉

聖旨是周輔成准從祀啟聖祠欽此欽遵擬合通行
爲此合咨前去煩爲轉行所屬照依程珦朱松等
主式造辦木主選吉期各處有司正官用綵亭鼓
樂等項迎主至啟聖祠捧安於先儒程珦之上安
畢仍備祭品告祠祭告於

啟聖公行禮如常儀施行等因准此擬合就行為此
案仰本道官吏照依咨案備奉

欽依內事理即便轉行各屬一體欽遵查照施行各
具遵行緣由繳查等因奉此擬合就行為此案仰

本府官吏照依案驗內事理即便轉行各屬一體
欽遵查照施行仍各具遵奉緣由徑報查考等因
奉此擬合就行為此帖仰本縣官吏照帖備奉

欽依內事理即將周輔成照依程珦朱松等主式置
備木主選擇吉辰該縣正官用綵亭鼓樂等項迎
主至本縣儒學

文廟後啟聖祠捧安於先儒程珦之上安畢仍備祭
品告祠祭告於

啟聖公行禮如常儀施行等因仍即會同吳縣一體
遵行逐一完備申報

周氏遺芳集 卷之十一 本府以憑擇吉迎送府學

文廟後啟聖祠中安位完日即具遵行過緣由徑自
申報

撫二院 兵糧二道查考仍申本府知會施行俱
毋違錯未便須至帖者

右帖下長洲縣准此

萬曆二十三年十二月 日吏丘從周

帖押

本配享府學啟聖祠祭文

維

萬曆二十四年歲次丙申二月辛卯朔越初九日

巳亥之吉蘇州府知府孫成泰等欽奉

皇命謹以牲醴之儀致祭于

宋先儒諫議大夫周輔成之神曰惟天愛道篤生
哲人抱粹顯懿爲宋名臣挺誕大儒羽翼聖真發
揚秘奧理學聿新寔啟程朱功烈竝臻未崇昭報
特煥

帝綸配享 啟聖列於明禋推恩所自俎豆是陳永

垂盛典千古恪遵尚饗

配享縣學啟聖祠祭畢口占

江盈科

聖朝崇道重儒先特煥
綸音降九天從祀校黌尊
諫議追隆禮樂念真傳
斯文未喪遺千載道脈重
光肇百年彛典幸逢
明盛世推恩所自配諸賢

上祖諫議大夫配享啟聖祠喜而謹賦

鳳闕魏弢雨露新
聖恩良沃宋儒臣
丹宸特諭

追賢詔黌校傳宣煥
帝綸茲祀百年沾配享明

禮千古恪遵巡累沐
國朝崇重典寒微均被

上皇仁
十八代孫希孟百拜題

道國周元公世家

元公與諸賢並列於人物則繼往開來之功當亞
於孔孟非夫人所可儼倫也故法太史公作世家
示尊也公之書已行於世與六經四子並傳其雜
著詩文有濂溪大成集詳載前卷四世孫興裔扈
蹕南渡奏立元公祠於吳縣胥臺鄉子孫遂留吳
焉嗣後累世出仕治政事績輯錄於後

紀勅祠故址

元公舊祠四世孫興裔奏請勅建於吳縣胥臺鄉
春秋享祀歲久傾圯至元盛時復建於故址至正
兵燹復燼數十年莫能修舉祀典隨曠迨正統元

年十一世孫浦始構家廟名曰崇本堂中祀始祖
道國元公神主武功以下歷代考妣序列左右子
孫時薦在長洲縣東城利字一屆大學士王直有
記

崇本堂記

崇本堂者周浦所作祠堂之名也祠以祀先昔之
作者未有名今名曰崇本尊祖也萬物本乎天人
本乎祖古者卿大夫士必有廟祀廟制不行於是
而有祠堂取尊祖之義以名之使爲子孫者仰而
望俯而思油然而興其孝敬之心亦君子之所可者

也周氏之先居汝之安城晉太康中有諱浚者都
督楊州又徙家秣陵其後子孫衆多散處遂昌浦
城營道代有顯人營道之族有輔成者登宋進士
第爲桂嶺令實生先生封道國公謚曰元先生嘗
過潯陽愛廬山之勝携長子壽家焉壽之孫興裔
官至武功大夫和州觀察使領侍衛馬軍都虞候
駐劄平江請立先生祠于吳縣胥臺鄉道山之左
武功與金人戰沒於福山勅葬虞山東麓子孫世
守焉宋世祠廢有元盛時浦之曾祖松江監稅文
英復建祠於故址監稅卒于江浙行省照磨南奉

耐於道山子孫因家蘇城中至正兵亂祠又燬焉
浦之父長洲教諭敏嘗欲重構而力不逮浦與淵
奮欲成父志淵出爲遂昌令滿九年銖積寸累得
餘俸若干欲以修祠堂歸錢塘而卒浦極力營建
崇本堂於正寢之東中祀先生武功以下置列左
右凡器用皆具繚以周垣正統元年

朝廷尊崇儒道凡聖賢子孫皆免徭役其秀茂者收
錄之恩禮至厚也先生子孫之在姑蘇者初由道
而徙郡守况侯驗其實皆免之浦旣蒙

朝廷之德而益重本源之思至是堂成欲使子孫篤
不忘其所自出而恭敬奉承於悠久旣以崇本揭
于楣使其子融縣丞綱來京師因都察院司務鄒
亮屬予記自孟子沒而聖人之道不傳學者莫知
所嚮先生奮乎百世之下負絕出之資有默契之
妙繼往聖開來學圖書之作闡陰陽鬼神之秘啟
性命道德之奧使天下後世曉然知聖人之道如
日之麗天其本自先生發之今祀於

宣聖之廟徧天下蓋不忘本也况爲子孫者乎禮不
忘其本而君子謂之仁以其心之厚也斯堂推本
於先生而尊事之信可謂厚矣然君子之尊祖豈

周氏遺集 卷之十一 三十七
獨祀享而已哉遵其道率其教而不違焉斯善矣
先生之道載之書其所以爲教者蓋曰誠五常之
本百行之源也苟能存誠則仁義禮智之具於心
孝悌忠順之見於事者皆無有不實此大賢君子
事也充而至於聖人不難矣今之學者皆知讀先
生之書求其爲教之本盡心焉則周氏子孫之當
務可知矣朝夕出入於此堂仰先生之德容服先
生之教誨皆有以明善誠身處則爲良士出則爲
良臣斯無愧於先生無負於

朝廷優待之盛意崇本之名不亦光遠有耀哉是爲

記

資政大夫吏部尚書兼

經筵官前

國史總裁

泰和王直撰

題濂溪周先生崇本堂後誌

禮莫大乎祀祀莫大乎本故周家禋祭首頌姜嫄
曾廟薦殷猶稱穆考有宋道國元公者家世道州
其崇奉祀典埒於孔氏之闕里孟氏之鄒嶧無容
具論矣其勅祠于古吳胥臺鄉則先生之四世孫
興裔也其構崇本於家廟者則先生之十一世孫
浦也興裔仕宋靖康之亂扈蹕南渡以和州觀察

使授武功大夫駐劄平江故得奏請隨任立祠焉
時與裔領侍衛馬軍都虞候率部兵五百餘鎮沿
海福山港與金虜對壘四無堅壁獨捍東南之衝
素以忠勇勵士內外阻絕猶張空拳冒白刃陣陷
身亡虜截其左臂去嘖嘖嘆爲奇男子云事聞朝
廷勅葬常熟之虞山陰其子昺爲常熟縣尉宋
亡入勝國八世孫文英復建於故址至正間胡運
將衰又遭兵燹傾圮數十年迨我

明正統改元有詔褒崇道學優錄先聖賢子孫元公
以倡明道統首蒙優恤故十一世孫浦得被恩錄

浦居恒雅念水木本源欲切羨墻之見乃建家廟
名曰崇本堂中祀元公神主武功以下歷代考妣
叙列左右使子孫時薦浦以文學補膠庠博雅而
壽優錫品服子綱爲廣西柳州府融縣縣丞有惠
政遂知縣事後先十八載因入覲謁太宰抑菴王
公作崇本堂記立之家廟綱子奎仍攝是縣兼羅
城懷遠二縣大滕之伐從予於戎閩中每言及其
祖浦建家廟崇本之因深用慷慨余謂武功以忠
孝之蹟奏祖祠於前浦以紹述之思建家廟於後
綱復因後先之美恢崇本雅意於景運昌明之時

斯皆元公道學開來之報久而彌芳也浦字玉泉
號安晚綱字文叙號謹齋有南遊藁周氏流芳集
藁謹齋詩藁周氏族譜藏於家余在諸生時耳安
晚先生久矣而及門之士若侍御趙忠儀部陳圭
皆耆儒碩德彥也則先生以道學嫡派授之家家
美訓之世世淑其自武功上達濂溪實炳燿之語
曰木大者陰繁本固者未茂干霄之樹下蔽千輪
其元公之謂歟余不文胡足爲崇本重竊以景仰
之展聊以續貂抑菴而附於周氏之世譜云爾

後學韓雍謹識

萬曆四年崇本堂歲久坍塌浦之嫡孫與相與國
與爵重脩蓋爲神主浩繁雜而不專非所以副歷
朝隆重之典是以與爵於二十六年呈請
本府奉文捐貲重建專祠於長洲縣絃歌里文山
祠西堂廡煥然明禋如故子孫世守焉

目錄

濂溪世祠圖

附世祠畧

重建濂溪先生世祠記

申時行

宋周元公祠記

顧其志

蘇州府重建濂溪世祠碑記

諸壽賢

題濂溪世祠

錢有威

送先儒元公木主入祠祭文


朱燮元 郡侯

迎始祖元公木主入祠祭文

周與爵 裔孫

長洲縣重脩周濂溪祠碑記

胡士容 邑侯



濂溪周先生祠

此濂溪世祠也建於吾蘇長洲縣絃歌里舊祠勅
建於吳縣胥臺鄉春秋享祀屢經兵燹煨燼僅存
家廟名曰崇本堂祀典隨曠會

國朝以濂溪厥考躋配啟聖祠裔孫與爵感

皇上既優禮以崇儒子孫當承恩以報本因吳中勅
祠寢蕪先靈未妥呈請

本府勘明詳允奉文捐貲重建專祠經始於戊戌
之三月竣工於己亥之仲春中堂祀元公後堂祀
諫議以武功大夫爲配木主門額俱太府朱公命
大尹鄧公所立祠宇煥然一新恍若敕建之舊制

以復歷朝隆重之盛典也
維

皇明萬曆二十七年歲次己亥二月丁卯朔越十
六日丙寅之吉蘇州府知府朱燮元帖行長洲縣
謹備木主委儒學訓導袁本奉入本縣絃歌里專
祠爰用釋菜禮致祭于

宋先儒道國元公周惇頤暨

厥考諫議大夫周輔成之神曰斯文千古炳朗日
星有開必先誕育鍾靈伊惟元公圖書闡奧創啓
沈盲前承孔孟後裕朱程揆厥所自發源輔成禮

周氏遺芳集 卷之二 三
宜並秩歆薦逡巡百年曠祀再睹于今厥猷誰屬
遙遙孝孫篤請鼎建專祠孔殷嗚呼木主輝煌映
吳分人文亘古棣題輪奐式士民興起千齡俎豆
在列肅拜紛綸尚 饗


維

萬曆二十七年歲次己亥二月丁卯朔越二十日
庚午之吉十七代守祠奉祀孫與爵率男希臯希
夔茲因迎奉木主入祠蒙舉釋菜禮行爰用烝祭
昭報

始祖道國元公遡自

上祖諫議大夫暨

四世祖武功大夫之神曰道學開源發祥詒穀忠
義啓承鍾靈紹續壁立斯文高宗芳躅向泥家廟
之紛紜致匱明禋之馨馥越捐糗材請建祠宇載
獲薦殷敢告悃愾盛典于報功祿昭穆乎昌歆
亘古垂休丕承啓淑裕我後昆歲沾恩沐庶幾接
盼嚮於同堂瞻儀形乎鐫木烝嘗禴祀世載拳曲
尚 饗



重建濂溪先生世祠記

萬曆己亥

申時行

大學士

有宋周元公濂溪先生之四世孫曰興裔扈蹕南渡以觀察使蒞吳請於朝建先生祠祠之建於吳者自茲始其後載舉載廢百餘年莫能修復而其裔孫浦者乃構家廟又數十年而裔孫與爵呈請建於長洲絃歌里曰濂溪世祠云先生闡明聖學開世淑人有功於斯文甚大宋嘉定間賜謚曰元以先生配食孔廟著於彞典迨我

國家崇儒重道世授其子孫一人為博士追錄厥考

諫議大夫輔成從祀啟聖祠不啻渥矣而他郡國類有專祠并祀諫議大夫蓋推源意也先生生於道州筮仕分寧稅駕南康軍徙家廬山之下所歷豫章郴桂虔韶之境皆有名迹以故在在俎豆之其四世孫興裔殉節於吳雖先生宦跡未嘗至吳而道則衍於吳其祠於吳者蓋出於觀察之請建是禮之義起者也夫陵谷有遷變而道術常新時代有更嬗而人心常夙先生固道術宗而人心之仰止其神在天下猶水之在地中有其舉之莫敢廢也而况先生之子孫別籍於斯聚族於斯支系雲仍綿永無替則先生之靈爽非憑式是而胡以焄蒿悽愴如或見之者乎且吳故才藪乃今文靡而誕習汰而澆糠粃濂洛之緒論而正學蓁蕪司道脈者過其祠想見其人躍然景慕而興起未必非明教之助也夫一舉而光前德維世風是可紀也故因與爵之請而爲之記

宋周元公祠記

萬曆辛亥

顧其志

中丞

濂溪先生表章聖道使天下後世尊其學者人所知也濂溪生於道州徙於廬山而吳之遺裔猶得世其家者人不盡知也夫得世其家於吳蓋自四

世孫興裔始興裔以觀察使扈蹕南渡駐劄平江請建先生祠於吳縣胥臺鄉後興裔爲國死節歿於王事勅葬常熟虞山而子孫遂畱吳焉余嘗考蘇郡邑誌方其建祠之初春秋以官郡牧類祀子孫冠帶彬彬焉迨至正間以兵火廢百餘年莫能修復而正統元年裔孫浦者乃構爲家廟又數十年而十七世孫興爵於萬曆二十六年呈請重建於長洲縣絃歌里當興爵請建時會

國家追先生厥考從祀啟聖宮於是中堂祀先生後堂祀厥考而以武功大夫興裔配焉君子觀於其間而知興爵之孝與禮備也存先生之考者明先生之道有所自始存興裔者明先生之澤有所自衍蓋先生之祠如春陵九江等郡在在有之獨吳中之祠屢復屢廢僅存家廟雜而不專今仍以與爵之呈請建於絃歌里者爲世祠焉余嘗與東林諸君子論道學之源追畱吳之蹟共謂

國家報千載之斯文則先濂溪遡千古之道脈則兼諫議而原節義於繩武則并錄武功一舉而三善備當事者尋請建故事以成興爵之志則其若子若孫之世於吳者豈有艾哉茲重建成恐世之不

唐氏遺集 卷之十一 三十七
盡知也特爲之明所自始云

蘇州府重建濂溪世祠碑記 萬曆庚子 諸壽賢 禮部

卓哉周元公之爲烈也三代以下之庖羲也太極圖說推明天地萬物之原直與河圖洛書相表裏通書四十章又與太極圖說相表裏孔孟旣沒吾道不絕如綫至宋而始一發明元公實主盟焉昌黎公謂孟子之功不在禹下愚亦謂元公之功不在孟子下信哉維時所爲推行其道使得昌於當時者程伯子也所爲推明其道使得傳於後世者朱晦翁也今天下之號爲儒者不少矣或夷爲腐

或夷爲史又逃而爲禪而元公之道幾晦故後學有能統一者爲儒後裔有能崇祀元公者爲賢胤吾於與爵不無深契云聞之孝尚成先禮隆廟食故穆穆魯侯獨美明禋之典溫溫孔父遠稱刻銘之休誠以原委是重情禮用申繩武君子必不忍令丕構之久湮也若夫翼聖真而流慶承

皇命以揚輝乃履遺址思故宮毅然遠躅五百餘禩之前豈惟鴻儒流裔藉以增光寔惟司風紀者興仁孝之一助此濂溪世祠之重建與爵所以大有關於名教歟粵稽世祠創制有宋蓋自元公四世

孫興裔者授觀察使駐劄平江力請於朝勅建元
公祠於吳縣胥臺鄉道山之左禋祀歲舉孝思孔
昭將令垂徽猷以映來裔循鉅典而彰世守不謂
勅祠傾圯湮廢有年至元盛時復建故址至正兵
亂復罹煨燼傳至與爵之高祖諱浦者欲脩舊典
綿力弗逮于正統元年迺構家廟名曰崇本堂上
祀元公其下考妣序列昭穆然家廟規制陋隘非
所以副歷朝隆重之典是以與爵覩舊址之就蕪
毅然思復會萬曆乙未蒙

勅諭濂溪先生父諫議大夫輔成公從祀啟聖宮感

聖朝旣優禮以崇儒裔孫當承恩以重本與爵居吳
爲濂溪十七世孫呈請郡尊得朱公諱燮元懷襲
裳之思起甘棠之想爲之申詳助俸重建與爵奉
文乃發其帑貲集厥土木成祠於長洲絃歌里夙
廢聿興新構再起若塹垣若門廡若堂寢若庭祀
皆一時鼎成儉而弗陋華而弗逾依然勅建舊規
也計其程始營於戊戌之三月竣工於己亥之仲
春繇是太府復命大尹鄧公諱雲霄顏其楣曰濂
溪世祠所以崇

國典而別家廟也中堂專祀濂溪先生後堂專祀諫

議大夫以武功大夫興裔配焉鐫木爲主鼓樂迎
入以時釋菜禮委儒學訓導袁君本詣祠定位肅
拜所以申王恩而光俎豆也仍進與爵而命之曰
傳云盛德必百代祀信矣第清廟之設仁祖考於
無疆紀載之傳垂後裔於不朽於是謀述文詞來
託余手余觀勅祠肇於宋朝久湮非孝追祀出自
國典奉享爲忠况茲渠劇理應嗣承繼其後者遠邇
經始之心近思再造之力歲時迭移黍稷薦陳敬
恭之心不忒在天之靈式憑且出者宣道化以報
朝廷處者維道脈以開來學萃忠孝於一門衍慶澤

於千載明時重道之典子孫隆本之思庶幾永永
弗替哉是爲記 十八世孫希臯希夔立石

題濂溪世祠 遂有先生之祠 蓋吳錢有威生祠

河洛真傳數百年濂溪孫子有遺編道通太極一
丸外志在羲皇六畫前默契淵微倡絕學闡揚秘
奧啟羣賢知君世澤餘波遠吳楚斯文一脉傳

與海軍習吹吾世輩翁亦袁吳楚漢文之親轉來
 武亦志五義皇內畫前無轉賦詩學闡野
 國何奇真轉樓百平兼劉終千有豐蘇首最去跡
 經眼兼劉世師再造之力歲時迭移避亦海陳敬
 弗替若具燕晴天十八廿終帝皇帝變立亦以報
 初代千薄即報重葺之典千終劉本之思無幾永永

重修濂溪周先生祠記

濂溪先生未嘗留吳也迨四世孫興裔開闢於吳
 靖節於吳而吳遂有先生之祠蓋吳之有先生祠
 也其在宋嘉定間也予嘗考吳郡誌胥臺鄉有濂
 溪祠春秋以官致祭令勿絕而其後以兵火廢蓋
 吳之無先生祠也其在元至正間也今士容來宰
 茂苑徧舉諸祀典而濂溪先生祭弗及問其祠則
 有在絃歌里者其專祠也中堂祀先生後堂祀厥
 考而以武功大夫興裔為配又有在濂溪坊者其
 家廟也元公祀其上而自興裔以來數世考妣列

昭穆於下故其堂亦曰崇本以示不敢比於公祠之義則其無公祭固也至專祠之建亦既創議於太守朱公變元奠位於前宰鄧公雲霄矣暮年而落成釋菜以載木則凡蒞茲土者亦既輝煌其額矣報成於秩宗則又錄其嗣之賢希夔衣冠奉祀矣祠之東厥有信國公文丞相祠云庭燎之焰直與正氣俱升忠烈之顏且與丹心比赤拜其像登其堂吳人之興起蒸蒸如也獨是先生之俎豆先生之堂寢不及與文山廟貌駟奕一時至今謁其祠者興嗟於庭草之俱蕪而圖書之竝杳也豈非守土者之責耶說者謂其後人實不欲祀其先也誣也水源木本有心盡然焉有子孫而不欲祀其先者哉卽如爾祖興裔之建祠也官於吳遂請祠於吳孝子一日不忍忘其先大抵如斯矣移孝作忠厥後遂有福山之事當其時孤臣戰骨白於霜一旅忠魂清於月其吞胡之恨且先燕山之樓柴市之慘而起也吾於建祠之日而微覘之矣爾後人獨不聞之乎且也家廟以崇本專祠以報功載在祀典於今爲烈爾後人亦不聞之乎吾故曰誣也雖然咸秩無文

天子之靈修廢舉墜長吏之責予不佞向爲塘工之役不惜與吳民作一頭陀今舉百年之祀又何難爲先生作一祭主哉况先生之道旣無日不南則今日之吳當無歲弗祀吾故觀吳人士闡揚圖說蔚起斯文則夫彷彿風月之餘追摹金玉之範者葺祠崇祀殆非予一人之心也其又吳人士之心矣屬歲儉公帑不支不揣捐俸數金進其十七世孫與爵粗修之爲請於郡列諸祀典歲歲薦血食焉蓋與爵者卽捐貲成先生之祠與輯先生大成集行世者也其亦武功之風類也夫因勒石爲記

皇明萬曆肆拾叁年乙卯九月吉旦

賜同進士出身文林郎直隸蘇州府長洲縣知縣黃州胡士容撰

正學淵源

國子諸生長洲陳元素書丹

倡明絕學

郡諸生崑山張幼文篆額

道統中興 長洲縣知縣韓原善 萬曆壬子年仲冬立

翼聖正宗 崑山縣知縣祝耀祖 萬曆壬子年仲冬立

倡道東南 蘇州府知府林紹明 萬曆癸丑年孟冬立

濂溪周先生祠 長洲縣知縣胡士容 萬曆乙卯年孟秋立

真儒正印 蘇州府知府陳訏謨 萬曆丁巳年仲春立

周元公世系遺芳集卷之十二

吳郡守祠奉祀孫與爵 編輯

目錄

武功大夫遺像

武功大夫行實

宋敕諭興裔 是舉觀誥命

宋賜銀合藥口宣二道

錄武功大夫手劄一通

哭周興裔死節福山 郭元邁

追悼周興裔死節福山 虞允文

附水部南軒公事實

水部南軒公自贊

左次大夫

目錄

吳淞中師奉派與

武大功夫觀察使遺像

武大功夫觀察使遺像



和州觀察使武功大夫行實

大夫諱興裔字克振濂溪之曾孫也世居營道濂溪徙居九江祖諱壽父季仲大夫性質剛明策略宏遠政和間差充秦鳳路經略司書寫機宜文字召授閤門祇候未幾轉承節郎差潼州府廉訪使轉保義郎特授閤門宣贊宣和六年差知岷州轉承忠郎特授武功大夫文州刺史靖康蒙塵扈蹕臨安卽日召對除帶御器械爲和州觀察使尋差江東路總管建康駐節復差提舉宿衛親軍權兩浙淮南東路沿海置制司領侍衛馬軍都虞候兼

幹皇城司丐養提舉神佑觀復領主管侍衛馬軍行司公事以所部兵駐劄平江鎮守沿海福山港隨任奏立元公祠勅建於吳縣胥臺鄉後與金虜對壘戰沒王事勅葬虞山東麓積善鄉配王氏封汝南郡夫人尚書左僕射岐國公珪之女子昺爲迪功郎陰常熟縣尉有治績孫璵承仕郎秘書省檢閱文字曾孫才迪功郎祖孫四世耐葬虞山

宋勅制置使周興裔兼幹辦皇城司丐養提舉神佑觀誥命

朕聞虎闔戎司固先於贊畫麟臺秘府尤重於提

綱膺斯顯除宜屬舊弼卿性全夷粹德備直方負
經濟之宏才蘊幾微之敏識頃陪籌幄密贊樞庭
荐出鎮於近藩茲入佐於中禁尚期效職以副朕
懷欽哉勿替

宋撫問淮南東路沿海制置大使周興裔賜銀

合夏藥口宣

有勅卿比從舊弼出殿帥藩履茲炎燠之辰嘉乃
撫綏之畧用頒名劑以示至懷今差入內內侍省
東頭供奉官譚琮傳宣撫問及賜卿銀合夏藥想
宜知悉

宋撫問淮南東路沿海制置大使周興裔并賜

銀合臘藥口宣

有敕卿望高右府寄重留都當氣序之載嚴諒節
宣之無爽肆頒良劑昭示眷懷今差入內內侍省
西頭供奉官韓繹傳宣撫問并賜卿銀合臘藥想
宜知悉

錄武功大夫手劄一通

建炎三年春三月望後五日書暨丙申歲仲夏離
家隨奉命差知潼州廉訪使宣和六年復差知岷
州後轉文州刺史南北奔馳歲無寧晷視事如蝟

何暇於兒女事爲念哉况值國步多艱復有靖康之禍君臣遘難又蒙懷愍之塵是以朝廷去遠君子內乏骨鯁之臣任用小人致貽天下之憂四海生靈罹此倒懸困苦耶今皇上播遷之後黎元窘迫之際措置張皇進退失計雖警蹕臨安終非恢復之謨耳目雖聰明蔽惑於奸佞此某之所以三復流涕痛朝廷不自內省又見沮於潛善伯彥之譖掣肘莫伸今金虜分道南侵血我生民腥羶茅土此誠危急存亡之日臣死於君君死於社稷效死勿去泣思戴天之仇未復一腔忠赤未消傾露

葵藿當紆國難此我所以奄奄居外夙夜皇皇惟思當世之務奉法宣化憂形于東南境土兢業自持未暇于一夕安寢幾欲告歸灑掃祖廟先塋奈何王事靡盬弗克所願想我祖宗在天之靈必先鑒知烝嘗久缺不能脩時薦以盡裸獻之禮人子之情抱恨終天旣不能盡孝又不能盡忠臣子之心良有歉于是哉今附歸薄祿數金卽置備後開祭掃等儀願我二子皆如所言一一如我命我雖不得與祭使我子曷豈攝之當致其如在之誠吾祖宗亦必格而臨之少伸孝思以報劬勞也向後

之事難自逆料且我身如犬馬未足以爲報國恩
况朝廷養士多年我豈肯偷生于今日旣以許國
守正俟死寧前死一尺無退生一寸誓志不與金
虜並生身蹈白刃何足爲辭自雖不諒不訾之軀
臨不測之淵甘爲趙氏清白鬼此我矢心如而是而
樂於效死也雖未必能整破碎綱紀亦人臣當盡
節之時但有死之日無生歸之期故不以家爲念
二子當自勉旃不復以我爲慮臨楮飛血不知慷
慨所云

長男曷虔備牲醴香帛茶果祭品詣道州祭掃

列祖墳墓卽祭告先諫議大夫廟暨諸祖考妣
之靈事奉禮畢卽回九江沿具祭品同昱詣曾
祖元公祠祭告禮畢卽祭掃先高祖妣僊居縣
太君鄭氏墓暨曾祖考元公曾祖妣陸氏縉雲
縣君浦氏德清縣君祖考司封郎中祖妣鄭氏
夫人先考廸功郎先妣陶氏淑人之墓祭掃畢
卽撤餽餘祭奠汝母王氏汝南郡夫人之靈特
示男曷昱知此母得造次違亂來意皆依我所

言建炎三年三月書

哭周興裔死節福山

郭元邁

孤臣戰骨臨霜白一旅忠魂掛月清海島復聞田
氏義首陽還抗墨胎名刃錐敢蹈惟知死鼎鑊甘
飴豈憚烹一擲鴻毛輕太岳只今野老哭吞聲

追悼淮南東路沿海置制使周興裔死節福山

以詩贊之

虞允文

衰草吳天照夕陽孤臣白骨委沙場忠魂夢斷悲
秋月逆旅神凝望故鄉報國赤心存壯烈垂名青
史死猶香英雄未盡吞胡恨千古遺芳重壁璋

附

南軒公事實

南軒公諱才字仲美道國元公七世孫也賦性穎
異器宇弘暢早失怙恃勵志自學六經為本待人
以誠獎善嫉惡不苟趨競景定甲子領沿江制機
檢察水部兵乙亥革命征南行省帥府檄公與武
弁分撫郡之屬邑時軍伍貪恣日事剽掠公撫諭
之又桎人輸物不愜則魚貫斬首公悉解纍械釋
之不可勝數士卒掠他處生口賈粥公為館穀詢
其鄉里父母歸之同里朱氏蘇氏世讐朱賂千戶
期一夕藝蘇而屠之亦欲賂公公潛招蘇語其故
俾亦啗千戶以利兩全之因招二氏曉以禍福令

約爲婚姻遂釋怨丁丑歲有奸俠謀衰謀以動吳
民公歎曰吾始預撫安今茲復不順義一旦官兵
來吳民其無噍類乎因諭以氣運在天不在人之
理禁其奸不得發乃亟給帥閩撫諭符文迎勞官
兵遂不入境人得以寧比境來避者亦廩給之後
置縣設官領戶筭同寅上其功公曰吾前朝賤士
也所以與世委蛇誠不忍生民塗炭耳茲得爲太
平民幸矣忍復希名位哉遂老於耕桑嘗著宋史
略十六卷吳塘集若干卷藏於家子二文華授常
州儒學教授次文英以儒克世其業有澤物親民

二稿及庭芳集其言見水利條載郡誌

制機檢察水部兵自贊

早步宦途晚耕田野詩酒陶情逍遙林下以仁義
而宅心終不事乎虛假噫彼其所以深衣而幅巾
者亦庶幾無愧于儒雅也耶

目錄

紫華先生事實

幸僊留別二首

并引

三吳水利條陳

載姑蘇誌

題紫華先生行卷後

題黃省翁寫紫華先生真像贊

紫華先生自贊三首

慶耆吟

紫華先生題意

祖服傳孫十二韻

登樓二十韻

過吳塘故居

紫華先生事實

先生諱文英字紫華別號梅隱元公八世孫天資
剛正不妄談笑好學篤行博涉經史世居道州宋
季徙吳城之東讀書好道薄宦四方賓佐州縣建
言三吳水利申明兩浙鹽法詳讞疑獄議擬戶婚
所著論利病則有澤物親民錄又善文辭音律暇
則教子讀書琴尊自娛凡爲吟咏援筆立就積稿
數十伯命曰庭芳集藏于家訓其子曰吾詩不足
傳俾汝曹知予出處耳可傳者澤物親民錄云嘗
有幸道者過之見其讀叅同契道者曰子有宿契

可與語至暮留宿甚寒將熾炭道者止之視其所
衣一木棉裘其氣充然時方雪積道者所止有光
赫然出屋上雪不積聚隣人以爲火操水具至則
知非火紫華尤異之達旦留詩以別問道者所止
曰我舟泊於楓橋大雪後可來一會紫華冒寒而
往幸方倚篷而笑謂紫華曰子來矣卽出一小鼎
授以坎離交會之功紫華悟其意幸又曰後五十
年戊亥間當成子志余頃間便過洞庭七十二峰
西遊也歲甲戌紫華以幸所書展玩一過曰茲惟
時矣遂歛衽端坐而逝其留別詩亦寓意焉并附

錄於左

載在長洲誌

幸仙留別紫華二首

并引

梅隱周兄火龍水虎風雲間闊亦一時之良

遇也源之深流之長不易測也窻夜風雨鸞

和鳳鳴不易聽也旣早別因梅隱壁間韻賡

二首以寓再會爲意乞不示人知幸甚幸甚

倏來萍水忻一會巍崖秀谷泉流清抱琴半世調

不得連榻一宵通此生叅到無言方自覺學須有

志竟能成他年再可雲龍際息壤天涯寄其名

晦圓圓晦月不損影到澄江江更清有限炎涼宜

靜看無閑日月且浮生雲邊鸞鳳飛將倦塵界蟠
桃種不成我向生前了身事人於身後却虛名

三吳水利條陳

蘇湖常秀土田高下不等以十分爲率低田七分
高田三分所謂天下之利莫大於水田水田之美
無過於浙右五代末吳越錢王獨居東南專享此
利宋范文正公嘗論於朝曰江南圍田每一圍方
數十里中有河渠外有門閘旱則開閘引江水之
利澇則閉閘拒江水之害旱澇不及爲農美利嘗
詢訪高年云曩時兩浙未納土時蘇州有營田軍

四部共七八千餘人又有撩清夫專爲田事導河
築隄以減水患唐時歲熟錢五十文糴米一石自
歸宋之後慢於農政不復修舉田圍河港大半墮
壞今江浙之米石不下一貫比之當時其貴十倍
民不得不困國不得不虛矣前都水監於江面置
閘節水終非經久良法且如見置閘三處本意潮
來則拒潮來之水潮退則放江水決潮殊不知江
水源築塞水勢細緩內水外水高低無幾又閘之
相去不遠決放之水旣淺且緩又烏能衝激潮沙
而不積於江也施常年初無損益設遇澇歲覲其

傾洩江湖巨浸則見其不能此所謂徐行拯溺緩步救焚者也海者百川之所宗水有所歸則不泛濫善治水者必識其源流可也嘗經行太倉劉家港及吳松江之左右登高眺遠隨流尋源爲今之計莫若因水勢之所趨順其性而疏導之則易於成功劉家港南有一港名南石橋港近年天然深闊直通劉家港西南通橫塘以至夏駕浦入吳松江其中間有迂迴窄狹處若使疏浚深闊則太湖洩水一大路也某今棄吳松江東南塗之地姑置勿論而專意於江之東北劉家港白茅浦等處追

尋水脉開浚入海者蓋劉家港卽古婁江三江之一也深港濶此三吳東北洩水之尾閘斯所謂順天之時隨地之宜也惟開浚之法付之有司例將有田之家差夫動擾猶爲未便乞從省府差委諳通水利官諳沿海各處相視合浚港浦具數計工擬議申聞或都水監分官前來或選省府能宜於浙間富戶勸率百十家斟酌遠近及功績巨細照依捨糧賑饑例優以官祿擬定品給令其開浚考其成功如工役輕省者量行優叙如功績重大者優以一官激勸勉勵庶幾勞而無怨擾不及衆假

如凶年勸令富戶捐糧賑濟不過救一歲一處之
 災上有以官推此恩例成此美績則可弭浙西數
 郡久遠之災寧不偉歟經治之後更須都水監差
 官按行嚴督各州縣每歲修葺使其經久不廢或
 委行省官專一提調庶幾孰督事嚴免致有司樂
 歲則苟且玩視以為常程設遇澇歲則束手無措
 敗事傷農詩所謂迨天之未陰雨徹彼桑土綢繆
 牖戶者此也水利有成則樂歲相仍國富民安誠
 非小補

詳載姑蘇郡誌

題紫華先生行狀卷後

倪瓚

紫華上卿遊心恬澹之園濯神清冷之渚仕雖不
 顯利澤甚溥蚤遇真仙故晚得尸解上道學道之
 士非祖澤流慶骨相合仙精修真契何由仙靈降
 室哉觀陶真白冥通記庶知之耳因讀上卿碑及
 傳為之慨歎久之壬子九月二日雲林倪瓚書

題黃省翁寫紫華先生真像贊 高晞遠

神湛湛兮若淵氣融融兮似春兼文質之茂美極
 言行之溫純措諸事業可使民物之感遂歛之方
 寸能保元和而自珍彼求之於眉睫之間者宜得
 其形似之髣髴孰若索之於形骸之外者庶見其

周氏遺集 卷之十一
渾然天真也耶

紫華先生自贊三首

如斯面目如斯性情不史不野非濁非清松栢霜
姿芝蘭春英既具爾瞻必也正名噴玉堂茆舍無
心處四海堯天樂太平

瑞靄隴晴荷風晝清逍遙庭除優游性情淵淵如
神熙熙如春惟松斯貞惟蘭斯馨宜爾壽康德彼
雲仍

面目尋常襟懷迥別冶地陽春炎天霜雪蓮幙蓬
窻光風霽月澤物仁深隨時用拙出用之行龍虎

風雲舍之藏煙霞泉石

慶耆吟

紫華自述

六十年來事可征幾番風雨幾番晴晚思投筆身
先老蚤計乘桴道不行北闕上書憐孟浩南溟搏
翼笑莊生如今老大俱休問鼓腹堯天樂太平

紫華先生題意

紫素生華有自來先天水火孕胚胎九宮正位藏
金室三氣迴風上玉臺充實光輝儒闈域希夷恍
惚道梯媒靜觀虛白佳祥止三十六宮春自回

祖服傳孫二十韻

先人一毳裘遺年四十春當日授受時此意慈旣
憐屬我甫成人冠帶慕整鮮愜心感殷勤稱體宜
踰躑服置間歲寒紉補常完全貴之重華袞寶之
逾青氈故人綈袍情恩義尤絕懸箕裘寓做深襲
佩披誠虔吾今臻耆年先志固勿遷書紳敬諄諄
帶韋衷拳拳輕肥曷敢矜靚素惟純綠曩叨恩賜
衣胸膺金螭儀章制羅袍蟹韋丹鞞聯朱紫寧
無期時我適後先難封信李數易老知馮顛庶幾
寡悔尤口體相安便先裘幸不墜謹以吾子傳欽
哉服祖禧進修庸勉旃衣冠三世存子孫百世賢

爲謝九方歎與子遊於天

登樓二十韻

我樓異他樓俛仰成憑陵山林猶森嚴龍象先儀
承風月自棲遲煙靄時依凭良模契夙構瑞應符
佳徵不矯元龍高不屑王燦登樓中繫斯人母伐
亦毋矜道義和如春懷抱清逾水麴生分久疎觥
竿量不勝裙扇情已澌斤斧警自懲不爲物之喜
不爲物之憎過從屏俗類談笑多良朋學不趨僊
流道不墮禪乘教子耕研田負耒勤擔簦良農冀
有秋良士期賓興老我抱黃卷皓首惟青燈讀易

洗我心明善服我膺千篇優寸長百拙僅一能商
聲歌我詩忘形髮鬢髻斯時惟何時老子興題弘
韻語寄此懷聊識當年曾

過吳塘故居

紫華自述

滿目荒涼惱壯懷坐來猛省一場歎幾年積善讀
書地一旦成坵作瓦堆家國廢興同是理山河險
固有餘哀春深最是傷情處悞却尋巢燕子來

周元公世系遺芳集卷之十二

周元公世系遺芳集卷之十三

目錄

拙逸公事實

載姑蘇誌

拙逸公家訓

拙逸齋記

拙逸齋銘

拙逸自贊公服像

拙逸自贊深衣像

拙逸題孟孺人真贊

送周正道謁選序

陳基

楊翮

蔣堂

題吳王故宮梧桐園

題吳王故宮香水溪

題城東採蓮涇

題陽山丹井

已上四首俱載姑蘇誌

甲寅重九志感

九月十日得子敏書

孫源試周歌

餞周正道

錢良右

留別道翁先生

倪瓚

夜夢與正道遊西湖

王立中

和息菴衰老韻

拙逸自作

題正道篔簹圖

楊維禎

風雨夜宿拙逸齋中

倪瓚

賦九日登高

王立中

答寶幢直指上人

義猶傳

拙逸自撰

題拙逸先生行實後

王立中

周元公世系遺芳集卷之十二

吳郡守祠奉祀孫與爵 編輯

拙逸公行實

拙逸諱南老字正道本道州人濂溪先生九世孫
宋季徙居於吳祖才父文英自有傳公幼聰慧識
量過人讀書覽輒記憶元季用薦授永豐縣學教
諭改當塗縣代還會天下亂省臣奏爲吳縣主簿
有僧普益殺人久不行尸南老移檄責縣神次日
覺羣鳥飛繞有異跡其所止獲尸於湖濱縣稱神
明尋辟爲浙省掾上書言時政六事曰開荒田節

財用通鹽法息奔競辨禮分公銓選除兩浙鹽運
司知事進淮南行省照磨改浙江行省進權理問
國朝洪武初徵詣太常議郊祀禮禮成發臨安居住
放還卒公生平端毅好學其學本於義理而詳於
制度所著有易傳集說喪祭禮舉要姑蘇雜詠拙
逸稿子敏字遜學洪武中舉任長洲縣學教諭後
與金華胡隆成同 召入京以親老辭歸親終服
闋改廣東軍器局副使子四汝浦淵源汝安溪主
簿浦齒德並邵賜品服與鄉飲淵遂昌知縣浦之
子綱字文叙以薦授廣西融縣丞進知縣治縣十

有八年有惠政於融成化中都御史韓雍以融人
思綱不忘奏綱子奎爲融縣丞未幾進攝知縣兼
攝羅城懷遠二縣協贊韓襄毅公區畫百計以靖
洞蠻蓋奎隨父久任熟知地輿蠻賊巢穴皆奎所
知經戰悉以指示無不克捷功成之後堅辭爵賞
後丁母憂改茶陵州判卒 載姑蘇誌

拙逸公家訓

學不師古非學也師古而非以正亦非學也聖人
之道具在方策大而性命道德細而名物度數皆
學也夫學之道不由誠意正心而加存養省察之

功則性命道德何有而明不由致知格物以盡夫事物之理則名物度數何由而知故古之欲明明德於天下者必盡夫格物致知誠意正心之功而後能察夫義理措諸事業也六經論孟學庸古莫古於此學欲師古舍是而何以爲學耶當今之世孰不家有是書而讀之者亦未嘗無其人然在愚不肖者固不知斯道爲當世不易之理或昧而不明或習而不察而賢知者顧揣變測微驚世駭俗陰祖異端溺老莊之虛無慕瞿曇之寂滅或以竹林放曠爲行或以西崑組麗爲文掇集言辭動以

韓柳自許鍛煉韻語槩以陶韋爲言考索名數則以圖畫之高古爲據視性命道德爲虛文曰不必學以名物度數爲不切世用曰不足學不知韓柳之精粹陶韋之冲澹果外於道乎圖畫之高古不過圖形似之彷彿豈能一一精備而可據以爲制作耶其所以爲吾道之害者莫大於此其所以駭俗驚愚誣惑後學者又莫盛於此或曰人有天資之高下豈能盡聖賢之事而造於道哉殊不知資稟之高者必由學而成資稟之下者亦必由學而化其曰天資云者是甘於自棄也其爲不仁甚矣

顧予之言資稟固有高下氣質固有不齊雖不能一一到聖賢地位然爲學之法則必當以聖賢爲期知之必致行之必力一師於古一歸於正毋誇詞章而闖靡母泥傳註而穿鑿則庶乎聖賢之學也苟學之未至亦不失爲善人夫鈞陶猶能變土學豈不能變氣質哉予幼習父師之訓拳拳服膺今耄矣未能致其實踐之功而於正邪真妄之途則不敢不審若夫科場之程文應世之詞章特餘事耳亦未嘗學焉文以達辭詩以寫情字以正心未始敢求異於人講學之暇輒著是說以爲家學

訓若子若孫識之勉之

洪武甲寅春三月朔旦春陵南老識

拙逸齋記

陳基

惟天下大拙能爲天下之至巧造物者大拙也而至巧存焉今夫草木至微者也而其生也造物亦何容乎其間而洪者纖者鉅者細者頰仰者向背者方圓而曲直者林林總總莫之有紀雖直良工之刻鏤曾不足以髣髴其萬一非惟草木也凡跂行啄息雲飛淵泳仰飲而俯啄者亦莫不皆然造物者亦未嘗弊弊然若世之衆技鑽其巧心紛紛

攘攘與百工角能哉易曰乾道變化各正性命此之謂也吳郡周君正道甫以詩書六藝爲業其先大夫大使府君以儒術緣飾吏事瓌瑋博達爲東南學者師而正道少從府君宦遊四方其外舅故松江府判孟府君實故宋信安郡王五世孫也而正道出入二父間皆異時老成典刑爲世師表余不及識大使府君而幸及識孟府君正道以府君佳婿出入侍傍應對唯喏進退折旋如芝蘭玉樹楚楚不凡自是與正道交游且三十寒暑不啻矣間以習聞於二府間者出遊與世酬酢如庖丁解

牛動中肯綮而其博學多能雖醫方藥術亦各臻其妙若正道者蓋所謂至巧也而乃以拙逸命其齋殆大巧若拙歟正道裔出故宋汝南周先生元公而拙逸云者公之自謂也公以道學繼孟氏千載不傳之緒而其賦拙有曰巧者勞拙者逸巧者凶拙者吉而其卒章有曰天下拙刑政撤上安下順風清弊絕於戲此非孔子所謂無爲而天下治乎余今與正道誦其詩讀其書光風霽月若將見之而正道以習聞於二父間者豈獨善其身哉亦曰士大夫出處無常惟義之歸而已

洪武元年四月甲子記

拙逸齋銘

楊翮

舉世機變卽禮慝疲爾形神心役役外重內拙含
厥德恬淡無爲安所逸周父表之名其室將終身
焉永惟惕銘其名者楊子翮

拙逸自贊公服像

形朴而氣舒性拙而材疎少馳騁於文藝之場壯
涉歷於艱難之途其朱衣象笏者卽青燈華髮之
故吾噫歲月之旣往聊遜逸於桑榆

拙逸自贊深衣像

幼力於學老未聞道敬以自持是則是效將致謹
乎言行顧此心之慥慥服斯服而成此肖貌者皆
過庭之教也

拙逸老人題孟孺人真贊

係亞聖公五十三世孫潼之女也享年五十

有三祔葬于落星涇祖塋之次

甫笄而嬪克敬克勤相我內事三十七春繁工容
之具美惟德人之所有斯孟氏之令女實我宗之

賢婦 銘

惟茲惟淑婦道雄肅同穴有誓爰宅茲隩

送周正道謁選序

蔣興堂

科舉行三十年士之有志者鮮不卓然表見於世自非偃蹇鄉里間放意文墨繩檢之外以求一切速化者孰肯旁蹊側逕反自取於迂遠哉吾鄉有周正道者觀其質粹然而溫也聽其言曄然而文也探之以業術驗之以志慮扣之以事物之所疑浩浩乎若未可詰而窮也吾意若人之資身譁世者已具蓋將爲時之用也不遠矣方且斷斷與羣儒較羸縮司出納疲精勞思心切笑之以是瑣瑣者豈吾曹所宜爲哉况風紀之面試難於初有司

之稽考嚴於終小夫賤隸叫號衝突日囂囂然皆得誚而侮之而正道處之恬不以爲耻一日代去忻然來曰吾雖不類豈以是爲功名哉士患已之不修耳萬鍾何多一介何少固不在外者爲榮辱也吾見世之建功立業奔走於四方非不誇且榮也然捐親戚棄祠墓蹈不測之險出沒于禍變憂懼中以僥倖于一時爲不少矣豈若君子游弦歌之鄉講學道愛人之語從容乎井邑之間跬步于衽席之上彼所謂卓然能自見者度時可爲而爲之不然亦不失爲善人以此較之孰得孰失哉予

感其言類知乎道者也故錄以爲序

題吳王宮梧桐園

拙逸

碧團宮園樹會宿朝陽鳳花開襲香霏葉密纖纖
蒼雨雜璫珮聲風生金石弄初秋一葉零深宮愁
已動前園忽橫生怪入夫差夢知匪棟梁材盲僮
斯備從

題吳王故宮香水溪

吳宮香水溪俗傳脂粉塘暖波浮漲膩睛渚泛紅
芳美人曾此浴魂銷水猶香可憐清冷泉照此妖
冶粧不濯郎衣塵孰比華清湯只今開寶林曹溪

源更長

題城東採蓮涇

採蓮蓮有涇涇帶城東南美人棹輕橈花深采芳
蒂香風飄翠舉明粧照紅酣摘鮮駢紫葍顧影墮
瑤簪藕絲長不斷君情短何慙食甘心死苦君樂
非所堪

題陽山丹井

鶴仙丁令威宅枕陽山陲仙化鶴不返宅廢人已
非餘遺丹井在井口苔生衣丹光時夜發猶能照
巖扉月斜人籟寂鶴自遼東歸爲歌華表吟但傷

知音稀

已上四首載姑蘇郡志

甲寅重九志感 并序

有懷壬子歲九日值雨子敏具酒設酬節留
 倪雲林在荒齋圖秋亭雨意并賦詩座中申
 屠仲權金德進徐彥純談笑終日今年喜晴
 而吾子上京未歸德進助教國學仲權留應
 天府彥純訓導吳庠雲林在江上獨余困坐
 寂寥感而賦之

予能為養奉時羞佳客紛紛為雨留圖寫雲林神
 妙品坐談珠玉總儒流人情會合難期再節序推

遷復兩周自嘆吾生幾重九胡為役役感行休

九月十日得子敏書

數畧橫江無縱鱗幽潛何地遂沉淪文身自絕猶
 荆俗負耒誰能似野人束帶折腰非所樂賣書供
 爨未全貧子還有日殊堪喜捧檄歸來祇為親

孫源試周歌

汝浦淵源原上游上游來自崑崙丘四字名孫與
 實伴孫源今日始試周敷茵布席羅膳羞糗餌堆
 盤橘果稠爵進玉醅液新篳香泛碧雲茶滿甌左
 陳經史及鴻疇右橫戈弓并鉏鉤東序中書積墨

侯西列槩量排牙籌百爾縱橫各相攸盤跚跬進
觀何由電光炯炯明雙眸頭角崢嶸匪凡流首拈
古易歡狎優次握祖印莫他求踞地注目形神留
聲鳴欲與鳳皇儔吾有此四百不憂便擬從心與
天遊階下孫枝挺琳球堂前桂樹搏螭蚪於焉游
息而藏脩濂溪德澤馨千秋承家不願公與侯熟
讀詩書紹箕裘行逢泰運恢皇猷四海文同皆魯
鄒時歟時歟樂古謳鋪張與國爲匹休

餞周正道

錢良右

春盡江城柳絮飛送春未了送君歸青山欲語煩

畱客綠水多情趣染衣學道橫經傳闢奧還鄉奉
筇壽庭闈一官捷徑須時俊老我看書獨掩扉

留別道翁先生

倪瓚

一室蕭閑無市聲浦雲沙鳥到階庭朋來直諒惟
三益心醉離騷與六經曠世久懷頭已白經年不
見眼終青江村又作思君夢睡起長吟月滿汀

夜夢與周正道遊西湖

王立中

夢入西湖泛畫船覺來懷抱獨凄然猶思翠幙張
花底尚憶金鞍繫柳邊歲盡孤山愁老鶴春深葛
嶺怨啼鶻欲尋向日繁華景從此承平更百年

和息菴衰老韻

拙逸自作

病後腰脚疲蹒跚奚所之坐占南簷暖含哺娛孫
嬉舉世少青盼老我慙白癡瓊樓駕窳泐玉宇凌
嶮嶇遙光恍隔霧泪眼枯欲萎壯懷衰已久幼志
貞不移柰此遲暮何富貴非吾時居幽養期願長
年誦書詩

題周正道篔簹圖

楊維禎

提舉

自愛家雞特與傳故將餘墨寫娟娟風枝雨葉秋
無籟夢落湘雲楚水邊

風雨夜宿拙逸齋中

倪瓚

荒烟漠漠古長洲倦客悲吟歎滯留風雨打窓歸
夢短一尊且作醉鄉遊

賦九日登高

王立中

今歲登高天氣好已勝冒雨過蘇端吳山楓冷猿
聲晚震澤波澄鴈影寒紗帽尚懷高士落茱萸還
想故人看老來豈爲悲秋感自是尊前且共歡

答寶幢直指上人

拙逸自作

老儂欣病起冒雨扣松扉塵事愁相問閑情喜暫
依喚晴鳩獨語投暝鶴雙歸坐久成歡劇條然與
世違

周氏遺芳集 卷之十三 義猫傳

拙逸自撰

頃有猫牝色純白體無雜文兩目一金黃一紺碧世所謂日月眼者是也時來余家家人深愛之每設食於庭除以伺其至至則巡墻而下循除而食徘徊顧瞻咄舌搖尾久之輒去率以爲常而日必一至焉如是者歲餘遂兩忘縱其所如時當兵變里巷間鞠爲茂草猫失所宇家其來食也愈頻家人哀之故食之也必時其性類野狸或出或沒往來雖久終不能留一日忽呼鳴簷廡間哀號若有訴少間復聞乳猫聲視之乃知其銜所生兒置余

屋東廡而去家人具鮮食食其兒編草爲棲以畜之其牝日至如前乳其兒食旣仍去日或再至甚月兒長其牝遂不知所之兒絕類牝其色與目皆如之遂呼爲雪兒兒猶警敏過常倉廡庖厨視之不少懈鼠或跳梁兒一舉目輒墜地由是庭除之間絕無鼠迹而或賓筵盛設魚肉盈案兒枕籍於旁與之食則食不與則勿敢顧衎衎焉跋跋焉柔馴可愛舉家無有憎者余再罹兵創遁入京卽日上道家悉散軼兒守故居哀鳴不忍去隣婦捕之將歸養嚙其指乃逸翌日余子女獲返舍仍來依

焉自是家事益廢日食或不備兒亦終不厭每卽
白飯終月不知鮮味服勤余家越十五年迄今無
恙余嘗於亂離中收養流冗子二人皆始髫鬣一
全生於饑寒之餘一脫命於兵刃之頃鞠之育之
亦十餘載俱能成乃視余之有無爲去留計間呼
雪兒曰終日號呶得無饑乎胡不舍而去寧死於
是耶雪兒終不易所守二子不堪余貧以漸乖離
悉去余余觀今之人災而附寒而棄鮮有能類雪
兒之爲者衆曰雪兒義猫是可傳以傳厥後
周子曰猫義畜也母子皆能循乎義而不爲獸畜

之行然而含齒戴髮被衣粒食爲物之靈者反乖
於義悲夫此聖人之所以誦黃鳥之說而曰可以
人而不如鳥乎

題拙逸先生行實後

王立中

拙逸翁卒年八十有三葬吳縣落星涇道山先塋
之傍自誌其墓旣葬之數月其孤敏復述家世之
淵源及先考之平生行實繕錄成卷以謂予與若
翁交游至深且久而獨存者將以求訂正焉詳觀
所載周氏自汝墳三遷來吳由漢迄今歷千有餘
歲衣冠文獻代不乏人可謂源深流長矣至拙逸

弱冠喪父乃能篤志好學修身勵行稍壯接武縉
 紳樂育後進遂以文學起家佐縣邑叅省幙推誠
 盡敬悉能獲乎上不為皎皎之行從容閒暇所施
 無非濟物利民之事終身無少玷缺可以見其賢
 能矣使得時行道盡摠所蘊詎止於此而已乎然
 仕不能稱其德抑有命焉仁者必有後若造物施
 報不在於身亦在于子孫矣敏之意非欲為溢美
 也殆恐歲月愈久泯沒無聞是為憾爾惜予衰老毫
 無用於時弗能為之重輕將俟當世鴻筆膺斯文
 之任者必能發揮潛德以成人子揚名之志矣撫
 卷感愴竊識于後云時洪武十六年季冬朔旦

周元公世系遺芳集卷之十三

周元公世系遺芳集卷之十四

目錄

遜學公行實

天根月窟軒記

題天根月窟軒二首

天根月窟道者傳

送周遜學歸吳養親序

送周遜學赴長洲教諭序

餞周遜學詩

送周遜學教諭長洲詩

金文徽

倪贊

金珉

胡隆成

貝瓊

倪瓚

劉基

送周遜學教諭長洲詩

錢宰

送周遜學歸養詩

張壽

應制二首 遜學自述

讀周先生詞 并序

宋玘

誄周母孟孺人 并序

宋玘

周元公世系遺芳集卷之十四

吳郡守祠奉祀孫與爵 編輯

遜學公行實

遜學諱敏號天根月窟道者元公十世孫也龐凝
端恪器宏學博頎然而長尤美鬚髯六歲時母孟
夫人口授孝經小學即能成誦成童侍父宦游永
豐習舉子業學易於縣尹署中探隱索奧而易旨
大通洪武六年舉任長洲縣學教諭兼權蘇州府
學由是諸生歛華務實敦尚學行翕然而興洪武
十年應名儒徵中內廷試將充大用以親老辭歸

親終服闋改廣東軍器局副使明年以公事赴京
 疾卒歸葬于吳縣胥臺鄉祖塋之側配孟氏鄒國
 亞聖五十五代孫女子四汝浦淵源生平所著詩
 文及重輯周氏世譜藏于家詳載訓道邊節墓誌
 云

天根月窟軒記

金文徽

蘇之周遜學學易者也闢軒於其居東偏淵乎其
 虛廓乎其容洞而明深而寂也揭先天圓圖於中
 題之曰天根月窟晝矚而夜惟心領而神會推而
 前之未畫之妙躍如也引而後之已畫之象粲如

也曰緊昔邵先上隣太初下視萬化儵焉乘氣機
 而遐征則駕風鞭霆歷覽無際吾願有謁焉月陰
 之體也陰終於坤而其始生者如乎如其月之窟
 也窟其靜之藏也天陽之體也陽終於乾其始生
 者復乎復其天之根也根其動之萌也探乎月窟
 靜斯測矣躡乎天根動斯識矣陰陽其無窮也動
 靜其無端也翕之而或張也伏之而或彰也三十
 六宮之春盎然其盈藹然其和而不亢矣卓哉邵
 先示我本原按圖求象得意忘言茲其所以泝文
 王周孔之易而上及於庖犧氏之天也歟予聞而

扣之曰龍馬未形孰為之數庖犧未生孰為之畫
俾邵先而出於斯世也則夫天根月窟之往來其
遂無聞乎子之求易不猶有贅乎遜學曰天為吾
剛性為之根月為吾明心為之窟天根月窟吾心
性之易也邵先不出吾獨泯泯而已乎於是相視
一莞莫逆於心書以為天根月窟軒記

題天根月窟軒

倪瓚

手攀月窟躡天根已識乾坤即此身安樂窩中方
寸地浩然三十六宮春

又

張適

陰陽消長自然機奇耦初生要識微惟有至人洞
造化往來根窟受春暉復姤已前纔二氣誰名根
窟躡猶攀至人漏却春消散人物分明一顧間

天根月窟道者傳

金珉助教

天根月窟道者其上世道州春陵人來吳久矣道
者自少時從父拙逸翁授古易經讀之即粗知卦
畫之所紹始家有邵子像闢一室以祠之日居其
中誦讀不休取圓圖揭之座目視心悟者久之一
日假寐若有神告曰此天根也此月窟也一往一
來而造化之機不息矣寤以出所告翁曰必安樂

窩老也爾其以易專門乎後數日翁呼而問曰三
十六宮厥指攸歸具以邵意對翁笑曰天根月窟
奇童也因衍其說曰其宇宙中最大者莫如天地
之大也然天地一復姤也日往則月來暑往則寒
來非此乎其微者草木之榮瘁也昆蟲之變化也
一復姤也一天根月窟之往來也驗之人語默也
作止也其窮達壽夭也其智愚賢不肖也其死生
禍福也一復姤也一天根月窟之往來也聞以其
說語於東吳劬生生曰此眉睫之見耳烏觀天地
之大道精乎邵子之所深者月窟也其探而不可
得者子知之乎邵子之所躡者天根也其躡而不
能者子知之乎淵乎微哉非知道者孰能與於此
哉道者曰索有於無求實於虛斯老莊之緒餘也
吾固不取於子道者姓周氏名敏字遜學濂溪先
生之十世孫號天根月窟道者學於易故以是稱
之也

贊曰人之言曰九師具而易道晦有是哉昔者
伏羲氏出也畫焉而已未嘗有文字之可觀也
而規而爲圖者先天之學邵子之獨得者也豈
唯邵子若道者其亦得夫先天之學者乎

送周遜學歸吳養親序

胡隆成 助教

洪武十年二月十日隆成與常州教授儲惟德太平教授孫大雅松江教授沙溥淳安教授汪大本江陰教諭陳晟於潛教諭周繹長洲教諭周敏長興教諭沈熙丹陽教諭王觀宜與教諭尹範松江訓導林洵紹興訓導黃鄰長洲訓導邊節海鹽儒士桑慎十五人被 召入大內會

上祠社稷禮成 法駕所廻

上御奉天殿命詣 丹陛授 御製策題

上命退退就東西兩廡爲文文成者 賜膳光祿次

第進卷

上親覽喜溢 宸衷越七日

上御午門命隆成與惟德大雅大本助教國子溥主事秋官觀管勾地曹晟慎編脩 國史鄰典籍翰林繹伴讀 王宮範丞 太廟祠署洵以疾辭敏節乞歸養

上許之於是三人行而敏獨請於隆成曰敏與公等同被 寵召而今若此者以親老故無他侍養故耳雖尚健飯而出或移時且貽里門望跂去家千里憂思日積寧無朝夕虞哉

上既許歸子盍道所以去夫君猶親也事君親猶夫
事天也欲求事君而可不知事親欲求事親而可
不知事天必也事親能盡其誠而後事君能盡其
道苟事親有一毫之未盡則不能事天矣不能事
天其何以能事君哉周敏氏有見乎此所以乞養
於命官之初宜其去之速而來之亦未爲晚也故
因道其所以去而并述其所以來者如此敏字遜
學元公十世孫長身玉立尤美髯鬚鬢鬯明潔蓋
純孝人也是月之廿三日序

送周遜學赴長洲儒學教諭序

貝 瓊 助教

今年春瓊與會稽趙倅同被 召至京師授國子

助教秋八月望預朝 奉天殿詔臣倅等至 御

前命之曰汝等一以孔子所定書誨諸生若蘇秦

張儀繇戰國尚詐故得行其說宜戒勿讀瓊等既

受命退而思曰古人有言曰孔子讀而儀秦行鷺

翰而鳳音也天語及此豈非灼見其說不徒惑戰

國之君天下後世且惑之心術之蝨莫過於此歟

孔子之道自堯舜禹湯文武所傳著之易詩書禮

樂春秋者大中至正歷萬世而無弊也不幸亂於

百家而百家之中縱橫爲甚以其功利中君所好莫不說而從之視儒者之言仁義則爲迂而不言矣此一時習於傾危險頗前後一轍不能回其所向之途可勝嘆哉然古今帝王皆知尊孔子而黜儀秦未有舉其詐以戒人使禁所習而趨於正者敬識于心造次不忘凡遇諸生必懇懇告之焉蓋學孔子則進而爲信爲善以極於大而聖聖而神不翅梯之升高航之涉遠也儀秦智謀之末君子之所羞道者惡可襲其所爲乎大抵率人以正猶懼不能勝其詐矧以詐率人彼不正又何責矣此

上之命臣俶者將一洗天下之習而復乎三代之淳大哉言乎汝南周遜學者正道先生之子也器宏有學縉紳成器之適蘇之長洲縣司教職缺縣上之府府上之部試其文考其行遂授教諭以歸人謂偃革右文之日莫先於教化師儒之位雖卑藝優而德不足譽隆而道不明者弗與也其慎而不輕如此則遜學視彼屈於事何如哉於是大夫士歌詠以華之且求序其首因舉以爲告焉遜學其訓邑之子弟必一於正而無惑於蘇張之邪說也

洪武六年歲在癸丑冬十月初吉序

餞周遜學詩

倪瓚

遜學親契周廣文其先居楚之道州爲寫春
陵山色并詩偕餞其行

春陵嵐翠合山勢楚雲高春藹浮青壁晴曛醉碧
桃吟猿儔木客飛瀑亂松濤夢入千峰裏雲霄一
鳳毛

送周遜學赴長洲儒學教諭 劉基

朔風吹雪起寒波送客中流發棹歌酒至莫辭狼
藉醉情深無柰別離何雲連白下山光暝路入吳
門景趣多泮水紫芹香可攬倚看衿佩樂菁莪

贈周先生教諭長洲 會稽錢宰

建業姑蘇去復回登臨懷古兩高臺碧梧明月鳳
皇至黃草西風麋鹿來雲送征帆催畫舫江清別
酒歛銀盃明時賴有周文學歸向長洲爲育材

送周遜學歸養 無錫張籌少宰

聖主垂衣坐紫宸內官傳 詔進儒臣風雲九五
文明會禮樂三千制作新花繞鶯聲宮樹曉波涵
龍影御溝春吳中孝子陳情切喜動 天顏賜養
親

應制二首 遜學自述

五雲籠曉曙光分禁柳青青三月春金殿傳宣頒
聖策玉階序列選辭臣葡萄酒綠來官寺瑪瑙盤
紅集與珍自愧儒生無補治願將忠義答 皇仁

其二

大明天子策儒臣 御筆親題翰墨新信是人間
野樗櫟媿非天上玉麒麟東風彩伏開黃道白日
金門繞瑞雲文化一時昌泰運布衣承寵拜 丹
宸

誄姑蘇周先生

并序

宋 玘

姑蘇周遜學先生諱敏元公十世孫也父拙逸翁

其文章簡古不事華藻允精於易作周易集說任
信州永豐縣教諭先生隨父讀書從師傳經後緣
拙逸翁丁母艱還姑蘇先生於洪武癸丑以明經
爲長洲縣庠弟子師待人以信訓教嚴勤其授業
生徒鮮有不成才者若李英顧桓輩皆中高第先
生典教長洲凡十一載旣以親喪去職服闋改任
廣東軍器局副使公務之餘惟事經書丁卯典試
鄉闈其定取高下靡不得其當故主司咸服其學
識奈天年不永不克遂志以竟其設施於戲惜哉
故爲之誄以誌其實詞曰

窮經勵志才邁羣英典教庠序後進有成菁莪樂育表儀諸生秋闈考文如衡之平其德若斯寧不遐齡壽踰五旬遽隔幽冥作此誄詞永昭嘉名

誄周母孟孺人

并序

宋 玘

維永樂十一年三月初九日周母孟孺人以疾卒於家爰用明年五月朔祔葬于道山之原嗚呼予於孺人子淵同遊庠序蓋亦有年暨同脩書於秘館然孺人之行則知之詳矣矧古人有云丈夫之德見於事行婦人之美非誄不顯浦江趙先生旣銘其墓余竊以所知而追其遺懿云詞曰

生于盛族爲人端莊歸于周氏獲配賢良婦道無虧閭里稱揚中饋自專惟納酒漿迺墮厥天遠在異鄉居喪盡禮教子有方躬事紡績勤於蠶桑經營家業弗替烝嘗年企八旬宜壽宜康有生有死人道之常克終天年子孫滿堂樹背之德豈復重芳綵衣雖舊篋笥深藏孺人之德必有餘慶門祚綿延寧不遐昌祔厝先坐終而允臧是旌是告庶永不忘

周元公世系遺芳集卷之十四

周元公世系遺芳集卷之十五

目錄

退菴公行實

送安溪主簿周君赴任序

安晚公行實

安晚軒序

壽安晚翁周老師

壽安晚先生

周母錢碩人挽詩序

玉潤公行實

周叙

顧恂

陳圭

趙忠

尤安禮

送周玉潤赴遂昌知縣序

劉鉉

送周玉潤赴遂昌知縣

杜瓊

都門餞周玉潤之任遂昌

鄭鏐

贈遂昌周侯九載秩滿序

蘇祥

送周玉潤還吳省親序

趙友同

玉潤周侯像贊

汪繼宗

謹齋公行實

陳繼

周綱字說

趙季敷

送周文叙入覲

彭瑱

送周文叙入覲

送周文叙入覲

顧翼

禁烟日拜道山墓下詩

裔孫綱

清明掃墓

十月朔日有感 二首

和謹齋先生題墓

彭程

和謹齋先生題墓

徐達左

挽周母孟孺人

瞿緒

再挽

葛鏞

微垣公行實

元公十四世至十七世行畧

周元公世系遺芳集卷之十五

吳郡守祠奉祀孫與爵 編輯

退菴公行實

退菴諱汝字玉成元公十一世孫也性質剛毅志
行超卓洪武間以才薦除福建安溪主簿政務平
易不尚苛刻削奸豪去淫祀縉紳殊重之宣德已
酉以老賜歸與故舊賓客日相宴遊以終其高隱
之志享年八十有三配蔣氏子名維孫名鏜丙子
舉人授高安縣令鏜生八子其第八者名諒以歲
薦授和門儒學訓導年老告歸而卒祔葬道山

送安溪主簿周君赴任序 翰林編脩周叙
予嘗遊姑蘇側聞其間能世以儒業相承宦達勿
替者不一二數焉若今周君玉成名汝者世爲郡
舊族洪武初其先君遜學先生典教長洲并攝府
學流風餘韻至今人艷慕之先生諸子俱敦厚周
慎克稱其家玉成其長也次玉泉名浦以文學教
授于鄉季玉潤名淵以明經選授遂昌縣令予皆
獲識之嗚呼何其一家之多賢若此耶玉成治裝
戒行其鄉友徐孟得暨其素所交游者共祖餞之
而徵予文爲贈或者曰玉成馭歷宦途三十餘載

茲行宜膺顯秩以展其施顧乃栖遲於百里之邑
若未足副其意者余曰不然士之仕也貴於行道
不在乎秩之崇卑也况親民之職莫逾於縣縣有
令有丞而簿實佐之民有利病政有可否簿皆得
贊襄而一能行焉苟使其道行而惠施雖終身齒
下士之位不爲屈否則雖都高爵享厚祿其不內
自忤者幾希且玉成儒者得聞於家庭之訓有自
其所以紹先緒揚芳烈顧在此而不在彼也尚何
不足副其意耶吾知他日政化之洽聲譽之隆燁
然有稱於東南者必吾玉成矣則超擢之榮又奚

可淮涖哉衆曰躋遂序以送之時永樂二十一年
夏五月朔旦書

安晚公行實

安晚諱浦字玉泉元公十一世孫也爲人端重詳
慎以名節自持事親奉祭各盡其道與人高論必
執道德仁義博通經史教諭里巷循循有典則孝
弟篤塞踰四十年布衣韋帶徜徉林下若不知有
寵辱得失欲與弟淵舉復勅祠時淵除遂昌縣尹
任畢歸至錢塘而卒不竟其志正統元年浦於正
寢之東極力營建家廟名曰崇本堂子孫時薦天

順戊寅間天子頒維新之命有司舉公碩德宿儒
年高行重給冠帶榮身累與鄉飲賓筵享年九十
有六葬吳縣道山先塋之側配錢氏武肅王十七
世孫女子綱爲融縣令自有誌

安晚軒序

鄉貢進士顧恂

姑蘇周玉泉先生名浦號安晚家世衣冠清白相
尚至先生則名節自持隱德弗耀鄉里稱善人而
先生則一於善也年當六旬自分無用於世嘗闢
一室于家欲爲遺老計自號安晚間徵予序之予
謂人之生也幼而學壯而行老而求安者情也然

而或謂富貴所羈貧賤所困功名所就威武所屈
而不得其安多矣惟聖人則隨處而安富貴不能
淫貧賤不能移威武不能屈窮則獨善其身達則
兼善天下安其所安而已曷不觀乎衿衣鼓琴若
固有之舜之所以安於富貴也蔬食水飲樂在其
中孔子所以安於貧賤也治亦進亂亦進此伊尹
之安於仕也躬耕南陽不求聞達此孔明之安於
隱也其安不同其致則一也今先生以安晚自名
豈非老者人之晚景也晚景而能安則其終身之
安可知矣然其安也不膠於物惟適於心或樽酒

自娛或琴書自適或山水自怡樂桑榆之晚景飽
松菊之清趣檀風月之間情行無所期止無所預
齊死生一得喪同物我怡怡然雍雍然而不知其
年之邁于六十矣嗚呼達哉雖然達義者知幾安
分者守節此君子之所以有亨通之道也易曰安
節亨先生以之

宣德五年歲在庚戌孟陬望前三日序

壽祝安晚翁周老師

禮部司務門生陳圭

少微星燦爛昨夜喜降雲邊看壽域屏間羣仙席

上安晚軒前道先生初度玉梅開雪月兩嬋娟更有桂子蘭孫綵衣舞影翩躚春陵道脈有流傳太極載遺編會唾玉飛瓊蒸雲洩雨講道談記當年身登絳幄氣凌空尤勝玉堂仙願祝岡陵鶴筭霞觴頻進年年

壽安晚先生

監察御史門生趙忠

羨汝南夫子有風月浩無邊恰冬至陽回梅開數九草長庭前自家多少生意對明星華彩照人圓烏鵲巡簷喜報飛來白鶴翩躚衣冠文物舊流傳青史有遺編但收歛英豪撫時存用玩理鈞玄

幅巾杖屨微步藹春容和煦祗如仙謾倚新詞爲壽從今共祝年年

右二調調乃木蘭慢也

周母錢碩人挽詩序

叅議尤安禮

大凡不可以力而致者善之聲聲之尤不可掩者其咏歌乎蓋秉彝好德人之良心感而發之固有不得而然者此吾於周碩人哀輓詩什不自知其有深慕焉碩人姓錢氏武肅王十七世孫也既長歸蘇之周玉泉先生先生亦名閥聚指而居者甚夥碩人奉舅姑佐丞嘗處妯娌飭子孫靡不各循其道至於夫遭迤蹇則喻善言以寬之隣困婚喪

則脫簪珥以周之故其行著於家庭聞於鄉黨而播於士君子之聲詩者卓卓矣雖然世有偉人傑士翱翔當途勢足以飛聲智足以取譽迨其歿也泯然無稱者比比有之今碩人一婦而已閤然於閨門之內足跡罕接於外而人之慕之而咏歌之如此非其善之所致能如是乎若然則余知卷中諸作不特爲一時之觀美且爲周氏諸女若婦之良規又不特爲周氏之良規將見爲人婦者聞風而興起矣碩人諱淑徽其平生志行已具於墓刻茲不詳云

玉潤公行實

玉潤諱淵元公十一世孫性重厚端朴動不違禮由太學生選入秘閣纂修永樂大典書成試事於後軍都督府以能稱擢鉛山縣令民樂其治三轉改遂昌知縣以仁義待人政務寬簡操勵清貞姦豪斂戢秩滿邑民老壯相率赴道院兩司保留俄而以疾乞骸百姓攀轅載道晝夜不息歸至錢塘而卒享年六十葬吳縣落星涇先塋之側配金氏無子

詳載世譜

送周玉潤赴遂昌知縣序

中書劉鉉

吾鄉以儒業致顯者非一然克以禮範其家而後守之益固者惟周氏爲然周氏之先仕於前朝者皆已隆然有聲至遜學先生尤博綜經史日快快然於其間若於闔與無不得者卓卓然以崇其志若於古君子有不後者恒患世之行禮者未悉其要乃據禮經冠婚喪祭之急於日用者叅訂而籍之復置祭器故往往驗諸事而致諸用君子多之旣而典教長洲越二十載弟子來從者戶外屢恒滿然而砥礪淬濯隨材以造爲時偉器者不鮮也先生雖不祿已久至今稱周氏爲有禮者云矧諸

子蹈其家範一如曩昔故登仕版者益衆先生季子玉潤蚤以成鈞生出宰應城轉鉛山又轉電白政皆有稱今遷遂昌吾知其又將有稱矣蓋玉潤夙承家學其於禮也已聞之博見之真體之力推之達所謂如竹箭之在筠松栢之有心足以輝美其身而貞固其心以是而治邑則將致夫紛者理擾者寧強者柔戾者和恍者敦枉者直與夫梗夫治者舉將有以致其無不可也是則禮之致治也大矣故曰措則政施則行其以是歟吾所以知玉潤又將有稱者其亦以是歟若然則玉潤之禮學

周氏遺集 卷之十五 九
可謂不忝厥世矣故樂爲之序時宣德三年九月
一日也

送周玉潤赴遂昌知縣

杜瓊

曉承恩命出金鑿湛露沾衣尚未乾三邑轉稱新
治化千年猶守舊郎官風生淮海揚帆度潮滿錢
塘倚棹看想到遂昌春欲近梅邊仍取宓琴彈

都門餞周玉潤之任遂昌

鄭鏐

郎官出宰下蓬萊餞別都門把酒盃考最不慚文
獻裔濟時原尚老成才吳山雪騎衝寒渡浙水雲
帆霽曉開遙想吏民爭快覩遠停車蓋候均來

贈遂昌周侯九載秩滿序

蘇祥

聖朝撫有四海輿圖旣廣生齒日繁猶慮教化有
所未被故凡出宰百里者必慎擇其人以任厥職
士之懷材抱藝而獲與茲選者莫不以爲榮幸也
宣德戊申之冬姑蘇周侯來尹括蒼之平昌侯縉
紳士族也幼卽警敏讀書積文進于成均天官課
其材藝優出等夷授令尹職筮仕於鉛山歷宰應
城電白政成事集蔚有能聲且侯歷官旣久練達
老成熟於時政故其尹茲邑也如駕輕車以遵舊
路直易易耳然遂昌爲邑雖在長山邃谷中風俗

頗厚民遵禮教前是宰斯邑者不失之剛則失之柔不失之怠則失之迫往往弗獲乎民者有焉周侯之來邑也持謙謹之德行愷悌之政因民之所剛而利之擇可勞而勞之不剛不柔不怠不迫由辦止官器其材羣吏服其能度民懷其惠皆忻忻然仰之若父母敬之如神明徵稅不督而自辦庶務不期而自集濟濟洋洋咸稱道之以爲視古循吏雖卓茂之治密魯恭之宰中牟殆不是過也此亦周侯材藝之優真足以任百里之寄而不負朝廷慎擇之選也耶其榮且幸爲可知矣予先時

承乏六合邑庠訓職旣而歸閑田里耳濡周侯之政日染周侯之才心感周侯之德蓋亦有年矣故其九載秩滿將書最考也諸耆老咸徵言贈之遂書此以爲序

送周玉潤還吳省親序

文淵閣副總裁趙友同

余在吳中時聞有周氏者世以詩禮相承治家有矩範子弟咸恂恂佩服儒者氣習私心恒景慕焉而未遑一造詣也後來京師官有謁余官舍者秩然其禮藹然其辭濟濟然其風采問之淵其名玉

潤其字則長洲教諭周遜學之季子充貢於成均者款語移日爲之喜不自勝然猶未能悉其所蘊丙戌之歲朝廷纂修永樂大典廣召儒臣余與玉潤俱在選列尋又與之同史館相處閱三歲然後知其操守之端識見之敏問學之勤蓋真士之賢而能世其家者也由是相締爲忘年友今年大典書完玉潤私自念曰聖朝著令諸生肄業成均者三年歸省父母今我母在閭乖違已四寒暑顧寧能遷延安處此耶遂陳辭請謁果獲所請而歸行有日其友監察御史沈公德威徵言爲贈余不

敏言不成文烏足以爲行者美哉然竊念玉潤在家庭則有詩禮之習薰陶濡染以養其德性出而膺貢於朝則周旋師儒縉紳間廣詢博問以增益所未能斯爲幸固已多矣而又間獲歸省老母奉觴上壽作嬰蹄戲彩娛慈親之顏色以申愛慕之誠以致曠別之意吾不知玉潤復何幸而得此也昔韓退之謂歐陽詹在京師雖有離憂其志樂也詹在親側雖無離憂其志不樂也今玉潤或在京師以樂其志或在親側以抒其憂相望密邇往來有期可謂事出兩全而優於古人者矣抑所

以優于古人者玉潤尚當究其所因勉自樹立以
圖報效於將來庶幾人不特羨我朝爲多賢而
且羨周氏爲有後云永樂七年春王正月序

玉潤周侯像贊

汪繼宗訓導

從容乎禮義之地馳騁乎榮達之鄉棠陰出政德
譽日彰起列邑之艷慕儼容儀之端莊宜其膺
朝廷之寵命享祿祉而永康

謹齋公行實

謹齋公諱綱字文叙元公十二世孫資性剛敏精
周易通經史正統初試秋闈侍御成規程富交薦

綱經明行修才德全備中內廷試送禮部授廣西
柳州府融縣縣丞贊理宰事撫字心勞刑平政簡
會融有貲商業舟者十八人以讐妬誣盜柳慶二
郡守具獄垂成公力辯其在爲得脫後十八人共
賚五十萬錢來謝公竣却之時徭寇侵掠鄰境公
嚴督防守寇不敢近融之庠先在城外常被寇警
公移置城中且蒞獎作興融俗淫祀公悉禁止景
泰間融民饑公請發賑全活甚衆都御史王翱考
綱頗有力量幹辦公勤民夷信服陞本縣知縣時
值歲旱公引咎自責霖雨應禱郊有虎患公爲文

牒城隍虎卽遠遁重輯玉融邑誌藏于縣署又任
九載都御史葉盛考綱廉能在任保障有方憂勤
盡職徵科不濫交薦于朝 詔旌異賢能藩臬騰
獎以黃封纁幣寵異之欲陞大用未果致政歸公
前後治融十八載有惠政于融融民迄今祀之公
解組後會吳中狡獪有以外籍欲升其役者公因
疏累世恩典上之例得免役茲吳族之不被編役
者皆公力也林泉樂志享年六十配孟氏封孺人
鄒國亞聖公五十六代孫蓋周氏與孟氏寔三世
締姻云成化乙酉祔葬道山祖塋之側子三壁奎

參公所著謹齋詩文周氏遺芳集重編周氏世譜
二冊一置道州一藏于家及海內名公南遊贈咏
等集詳載張祝墓誌中

周綱字說

廬山陳繼

周君王泉有子名綱求字於予乃字之曰文叙玉
泉復請曰願爲說以暢厥義俾蹈懋績行因告曰
綱總也人之所以總持者得非文乎文道之顯者
也以道之顯者使秩而叙焉則禮樂之昭章尊卑
之高下才藝之明著言語之敷施皆足以顯而達
之矣至道之微而具於心以爲吾之性者勿昧勿

鑿多欺多失其光明洞徹根彙萬物而足以參天地贊化育者能致其力焉則道之顯者其文自然而叙矣於乎人孰無是性也全其性者其誰歟人孰不由其道也得其道者其誰歟孟子曰人皆可以爲堯舜綱也吾望爾而爲吾之言也時

永樂二年春王正月望日

送周文叙入覲

浦江趙季敷

余與文叙忝世誼與尊公安晚先生令先叔玉潤皆屬忘年交今已卯歲秋文叙當明春大聘之期

因入覲便道省事于親迎養安晚於官舍在任有九載而親思故鄉覓公便調護還家此在爲融縣丞之時轉陞縣尹又越五載不能恒侍左右以情申達于廣西兩臺二司關會於蘇州府支俸奉養而安晚先生年逾九十有六膺天子維新之命而進榮壽之官修天爵之貴也且康健而能飯是歲融宰衣錦還鄉爲親捧觴上壽于是廣之司守郡牧聞之挽道上之車共祝安晚翁之修齡也長安仙客進長生之酒歌紫芝之賦子舞萊綵之衣娛白髮之親文叙既能盡孝于親亦能盡忠于國

也明矣是以開樽北海分壽南山朱履填門親朋
燕會已極榮盛也冬之仲文叙欲北上餞者列于
道於是廬陵彭公墳武陵顧公翼陳公繼吳門錢
公紳張公收祖帳於金閨折柳枝以相贈各賦一
言以壯行色也詩并識之屬予爲弁首云歲次己
卯仲冬之吉

送周文叙入覲

彭 墳

依依高柳拂長亭有客之官覲 帝京鶯囀綠陰
春欲曉馬嘶芳草雨初晴一尊酒盡征帆遠兩岸
潮生去浪平後夜相思各千里暮雲春樹宿冥冥

送周文叙入覲

顧 翼

依依柳色動離情送客朝 天出故城千里風雲
瞻日月九重宮闕謁 皇明驪歌乍歇鶯聲宛春
路初晴馬足輕料得此行應顯秩善敷德教澤羣
生

禁煙日拜道山墓下詩

裔孫綱

是日重立道山二字石刻賦此

惟道名山故得新重看奎畫刻蒼珉顧瞻鬱鬱岡
頭樹深闕幽幽泉下人便欲相從問寔穿莫教老
去欲沉淪回頭猶未忘情處子拜孫趨俎豆陳

清明掃墓

榆煙生火又清明曉載扁舟過落星喜見故山春
自好痛憐新家草絕青花開隔霧嗟予老鳥勸提
壺笑獨醒幾處溫風散餽粥紙錢撩繞思冥冥

十月朔日有感

此日在濂江口吳人皆拜掃先隴感時追慕
不勝哀愴臨風灑泣而已寫示男奎

玉露溥霜十月交我心怵惕念劬勞道山望遠增
悲切德澤時思轉鬱陶祠下獻烝陳俎豆墓門剪
棘薦豚羔予今忠孝全無補血淚臨風濕布袍

其二

臨風血淚濕沾巾那更時驚物候新霜白草荒迷
古道風高眼健識通津心懷先隴青山外身繫微
官廣海濱更有琴川觀察墓逢時拜掃莫因循
過道山見新石刻和謹齋先生題墓

錢塘彭程

道山墳上草離離回首長吟起慕思千載高名遺
製作百年芳躅著崖碑楓林有夢歸魂夜桂室生
香集訓時俎豆未寒宗祀盛九原無復更傷悲
和謹齋先生題墓

徐達左

幾度論文接講筵托交親故竟忘年春陵芳躅應
君繼絕筆遺書有子傳琬琰誌銘長夜宅松楸烟
雨道山阡典刑耆舊凋零盡獨立秋風淚泫然

挽周母孟孺人

瞿緒

孟氏孺人兮亞聖孫年既及笄兮歸周門奉姑嫜
兮顏色溫相夫君兮樂儉勤薦烝嘗兮南澗蘋何
中道兮鸞鳳分有子立兮訓育成登臚仕兮揚政
聲三遷教兮儼存周大族兮衆所聞母範先兮
婦道尊嗚呼孺人兮孺人永無愧兮斯文

葛鏞

漢章公行實

漢章諱奎別號微垣元公十三世孫也公幼穎敏
好讀武侯兵書父綱爲融縣令在任十八載公隨
父任日久熟察廣西夷情及探洞蠻大藤道路平
險成化丙戌嶺表寇發都御史韓公雍秉鉞南征
莫知嚮導聞公諳習途徑檄致軍門公以不願爵
祿辭韓公給之曰高誼固不能強且畫一圖見示
如何公信爲然遂以素所指畫者作大藤峽柳峒
地輿圖及所著繼政錄以獻韓公得之授意司道
俄而符檄輿從登門迫往公不獲已勉整戎服韓

公待以殊禮凡軍興糧餉必與議謀調度公謂大
藤峽爲賊藪本也諸軍不先其本乃分兵逐末分
兵勢弱趨末無威我全師直搗南可以援雷廉東
可以應南韶西可以取柳慶北可以斷陽峒諸路
彼分而拒我聚而攻首尾互應破之必矣韓公深
以爲然遂統兵進攻悉倣用之無不奏捷因直搗
洞蠻巢穴殲滅無遺及計破九層樓諸壁先後斬
獲四萬一千七百有奇賊遂蕩平公實預有勞勩
司道嘉其功賚以猛勝銀牌韓公亦贈其詩有獻
我平蠻策多君衛國心句迨功成以後奏爲世襲

勳臣公以先賢後裔不欲授武職竟爾中止公遂
泯然無聞嗟乎今韓公祠祀方隆而公且弗獲配
享何報功之典獨靳於公耶抑意有所待耶識者
每有餘憾時融軍民擁詣轅門告曰融先令周綱
撫治得宜民夷引領今其子有父風願畱以蒞茲
土於是僉議上請遂擢公丞融邑攝令尹事公
治融如理家事興廢剔弊政肅民安且兼以懷遠
二縣值梁父諸蠻侵掠公周視地勢立關隘建夫
長爲防禦計夷民帖然叅議李公嘗刻石紀其事
又慶遠冲乾諸寇縱橫公約束官兵精猛進戰俘

獲甚衆民得其寧又擒桂林飄里等賊械報當道
奏捷 賜以金幣進階一級以獎其忠後丁內艱
韓公贈行詩云草木山川皆失色歸舟惟載萬民
心暨服闋銓曹錄其勩陞判茶陵茶陵僻居山谷
俗梟詐健訟公至州鋤強暴清訟源以誠化下以
躬率人故事集民安不見其爲難治弘治己酉羅
夷寇作融民冀公復任相率詣 闕道經茶陵時
公已遘疾而民間之皆涕泣悲號其感化民心如
此公以疾劇告歸逾年而卒享年六十有八配張
氏附葬於吳縣落星涇祖塋之側子鉞

器之公行實

器之諱鉞別號守拙元公十四世孫也公生而穎
異開爽端重嚴毅樂道不屈初習舉子業其爲文
璀璨驚炫人目咸擬其奮起有日旋竟以茶陵公
爲判時有弟卒於官舍乃棄夫所學往省其親而
茶陵公已遘疾公侍親還吳不二年而親歿居喪
哀毀骨立生平和以睦族嚴以訓子律已必正待
人必誠德蒞兼修能繩祖父之志享年五十有二
配陸氏合葬於長洲縣十五都菜字圩之新阡子
讚

時臣公行實

時臣諱讚別號隱溪元公十五世孫也公幼聰慧於詩書大義悉能通曉壯歲髮斑隱於城市氣槩曠達有箕山潁水之致甘爲盛世之逸民其處宗黨和氣藹然與人交恂恂溫雅未嘗疾言遽色人皆敬愛之享年八十有七配顧氏附葬於長洲縣十五都菜字圩新塋之側子侶先公卒

子猷公行實

子猷諱侶別號三泉元公十六世孫也弱冠明經未遂厥志力脩堂構盡菽水歡凡隱溪公未竟之

志欲舉之業公悉以身任之故隱溪公得逍遙几杖不復知有家累也公稟性誠朴勵志好脩事親以孝與人以信調恤里族不事趨競不履公庭歲時伏臘則置酒以召三黨務使盡歡卽平居客至亦必盤桓宴樂未嘗厭倦其貌恂恂其語溫溫雖童穉可與言而貴顯無所迎合吳人士咸稱爲世善之家云公追念始祖元公特祠遭罹兵燹僅存家廟先靈未妥祀典久虛屢請撫按復建坐以官帑不給公志竟弗克伸嘗曰但得吾子之有志者請復始祖祠祀以成吾志毋墜先業吾願畢矣忽

邁一疾遂先隱溪公而歿以奉養承志之事悉付諸子享年五十有七元配滕氏有宋兵部尚書諱甫謚章敏公之裔孫也閩範肅雍相夫有道訓勗諸子惟勵勤實陶令母也享年六十合葬於吳縣九龍塢之新阡子三與相與國與爵與相業儒數奇弗售與國治軒岐術嘗割股以療母伯仲亦相繼辭世遺命獨與爵承之

邦祿翁傳略

錢允治

邦祿翁者濂溪先生十七世孫也名與爵別號餘濂邦祿其字也蓋濂溪四世孫武功大夫與裔公

扈蹕南渡靖節於吳勅葬虞山而子孫占籍長洲世濟厥德而翁在周氏尤為白眉云翁素醇朴孝友性生早失怙恃孺慕靡忘凡析產分爨息以聽之伯兄無敢忤其意及卜兆營葬克盡大禮更念祖塋蕪廢躬自葺理遍植松檜蒼翠亭鬱皆知翁孝思也幼攻舉子業數奇不售不為怨天尤人唯隱居樂道拮据農桑徵輸不累催科租稅不責子母喜與好施見善必為人咸稱為長者翁狀貌恂恂儒雅舉動每以先民自程恒喜披圖閱史栽蓮種竹瀟灑襟懷綽有光風霽月氣象尤亟於脩明

祀典闡揚前業傷濂溪祠宇久廢蒸嘗缺略因力
請郡縣鼎建崇祠於絃歌里官帑不足盡捐已資
舉復二百年之曠典邑侯胡公爲請於臺察監司
俎豆千秋弗替旣作記立石以傳其事復致匾先
儒賢胤以旌其德翁又喜藏書每過市肆婆娑檢
閱偶得遺集雖殘編斷簡必倍價收之又纂輯濂
溪大成集及太極圖說世譜遺芳集等書鏤板置
之家塾倡明正學炳如日星而世系亦知考証故
翁鄉評推里名震京國儀部題給章服累劄褒
美以風世教時閩中吳公以進士高第視篆郡學

知翁令譽卽以承先啟後顏其堂於翁之行甚協
而吳中縉紳文學暨騷人墨士競爲詩歌以揚休
風連篇盈帙好事者并爲刻之俾他日志乘纂述
有稽翁子二長曰希臯次曰希夔俱文行兼脩象
賢濟美克稱佳胤孫枝遶膝而翁之壽考未有艾
矣

餘濂翁便服小像贊

里人錢允治

濂溪餘派衍於道州蓮峰分秀道脉東流恢弘先
業式廓前修七十古稀白雪盈頭子孫秩秩迭舞
獻酬卻冠服而不御惟巾舄以遨遊茲翁也砌蘭

庭玉將九萬之鵬搏莊椿竇桂閱八萬之春秋者乎

又

海虞嚴

澂

邵武太守

而貌脩然而骨稜然意度昂昂然目光炯炯然裳衣巾舄飄飄然玩丘壑於坐上擁琴書於膝前或署為竹中之高士或疑為鶴氅之神仙夫夫也身居廛壑而心遊帝先其斯為東吳之雋彥而無忝濂溪氏之後賢也耶

又

邑人錢之泰

厥貌端莊厥心孔良好施樂義不逐炎涼克承世

澤肯構肯堂鼎建專祠請復蒸嘗彙輯家乘大成遺芳壽諸梨棗永垂無疆義方迪後蘭桂芬香年德竝邵壽而且康池蓮共潔光霽同彰瞻者起敬世篤其昌

又

琴川蘇

隆

卽而近也藹然可親遠而望也挺然不羣立心光亨正大作事好謀底成建耑祠崇祀典井井有條紀碑石集羣書循循不紊邇其既往去大成十七傳覩先生之壽容如面覲元公之楷範逆其將來歷春秋千萬載秘先生之壽像如親炙元公之儀

刑濂溪啓美於前餘濂繼武於後竝照臨而著明
同覆載而不泯

餘濂翁榮壽圖像贊

海虞嚴澂

以爲仕乎則條然山癯若形骸而土木以爲隱乎
則儼然品秩又雍容其章服啓胤後嗣娛菽水於
高堂表揚先烈耀絲綸於幽谷繡爲口笥在腹霞
皎皎風謖謖匏樽兮土鼓渾金兮璞玉斯爲元公
之後賢長表世而範俗

又

華亭蔣之芳 學博

皤然道貌儼以清脩首服峩峩疑整孟嘉之帽朱

衣燁燁恍披五月之裘任一切之風波不以關其
笑口豈轉眼之青白乃足幻其雙眸江湖是侶廊
廟若儔甘聖世之逸七十齡其難老繩濂溪之武
革三正而作求

又

虞山孫朝肅 丙辰進士

卽其容也松柏挺直窺其度也淵宏莫測孝友則
天性獨成應酬則人情各適幹蠱剗祠蒸嘗寵錫
園亭表愛蓮之額克善繼述富裕享無疆之曆永
垂燕翼丹鉛所肖傳記所覈固宜爲先儒之賢胤
而無忝元公之世澤者也

又

同邑朱仲彥

翁之行誼於今為稀翁之脩齡於古亦稀霽月光
風而襟懷皤皤承先啓後而冠服巍巍之人也纂
述遺編得以書香繼燼鼎新祠宇能令俎豆重傳
如是懿德懋功直垂千秋而炳烺將見池蓮亭草
還同亘古而芬菲

又

吳閩姚際隆

裔出元公之胃生居泰伯之鄉世譜珍藏善述濂
溪統緒崇祠鼎新重增俎豆輝光寄高懷於雪月
風花之景耽涵跡於利名塵俗之場稀齡方屆眉

壽長康我冠整整章服煌煌桂子蘭孫斑衣遶膝
金枝玉葉士籍聯芳弦歌里齒德讓先生第一文
獻地簪纓羨周嗣永昌

爛此替縣美周嗣永昌伯之鄉世譜珍藏善述
金封王葉士辭緝寺海烟里齒齏齏夫主策一丈
壽身惠姓民望望章耶魁魁卦子蘭紅斑永壽親

不肖與爵既請復元公祠祀吳中之血食千秋矣
復念祖宗典籍散軼無存奕葉雲仍子姓漸廣因
先刻濂溪集復搜元公禱著詩文載焉名曰濂溪
大成集附輯四世祖諱興裔扈蹕忠勇殉節事實
七世祖諱才任沿江制機水部兵勳猷八世祖諱
文英開濬三吳水利條陳及遇仙傳九世祖諱南
老拙逸齋稿姑蘇襍詠義猶傳十世祖諱敏教諭
長洲敦化士子并列祖懿迹若通顯若隱淪傲天
順間鄒允明所識周氏流芳之意而復爲補輯之
爲遺芳集若干卷或攷國史或參家乘或檢殘缺

周氏遺考集 卷之六
之遺書或稽故老之稱說篇章汗漫僅存十一於
千百授諸梨棗藏於世祠俾後人追考先業咸興
紹述之思此與爵之意也唯世系相續開卷秩然
而竊有餘憾者則諱壽諱燾二祖並出元公今壽
支遞傳以及吾父皆與爵勉爲叙次而燾之支裔
在道州者實以地遠宗繁一時不能彙刻姑闕以
俟後之有志者

萬曆甲寅春月吳郡十七代孫與爵謹跋

(1619)

